

यूहन्नाए ओसरो चाव था

आव पोस्तोको येसुए उसिस यूहन्नाए ओसरो ज़। नो मिँलाई येसुए उयुँलाव मिताव उसिस मनी है यादोज़्याव (यूहन्ना २१:२०,२४)। आव पोस्तोकोल येसु ड़ादाकिनकाव परमेस्वर मिँ मिन्सिद हुव ज़ रैःज़्या — “आलाव सर्सिउ भरी जे येसुलाई, परमेस्वरए ओज़ा गेलाई बाँचैज़्याव खीस ज़ लिद जेयुँ सुहुपूघान्याए जूनी सर्द ड़ायाचिके। हो ताकिन ची जे नोए ल्योदा जेयुँ जेसुहुपूकिन होए उमिननी अजम्बरी जुनी दैन्या जेले” (२०:३१)। नो पाँत यहूदीराए याघेपूपाययुँ माहुपूद येसुस एकमून्या माखैव ज़ यालिज़्याव ब रैःज़्या।

परमेस्वर ज़ मिँ मिन्सिद उहुव

1भाःङ पाँ उलिज़्याव ज़। नो पाँ परमेस्वरस उलिज़्याव। नो पाँ ओल परमेस्वर ज़। 2 नो ड़ादाकिन ज़ परमेस्वरस उलिज़्याव। 3 ताव भरी ब नो पाँनी ज़ ताहुकेर। नो पाँनी माताहुव काता ज़ माले। 4 नो पाँनी ज़ पोहोन ब ताके। नो पोहोन ज़ मिँरालाई पलाँ जैघान्या ज़गै ब ताके। 5 नो ज़गैए चुम चुमोल पलाँ जैज़्याव। नो ज़गैलाई चुम चुमोए माहातैधुव।

6तछा परमेस्वरए उपरीव यूहन्ना यादोज़्याव मिँ तोबो हुके। 7 नो मिँ परमेस्वरनी हुव ज़गैवलाई प्राइँए सरेसूद यायुँ घुहुपूक लिद साचीए जूनी हुके। 8 ओल ते नो ज़गै माःक, ज़गैवलाई मिँरालाई सरेसो परीन्त्याए जूनी उहुव ची।

9नो ज़गै साचो ज़गै ज़ ओल्यो। नो आव मानुवात हुद प्राइँ मिँरालाई पलाँ जैद याएज़्याव। 10 नो मानुवात हुवए ज़ आव नाम नम जैक्यो। हितावत ब आव मानुवाताव मिँराए ओललाई मासरेसूधुकेर। 11 ओल नो उमीराए याल्योक ज़ हुके। खाली नोराए झन मासुमकेर। 12 हैदी मनी जो जोराए ओपाँर भैःद यायुँ हुपूज़्या,

हो होरालाई परमेस्वरए ओज़ार तान्या हक याएज़्याव। 13 नोर परमेस्वरए ओज़ार याताव संसारलाव बाबु आमानी ब माःक, क्वाँए ओपैँज़्यावनी ब माःक, मिँए गोहाईनी ब माःक, परमेस्वरनी वाँज़ ताज़्यार।

14नो पाँ ज़ मिँ मिन्सिद गेल्योक हुके। ओबाबुनी हुव तोबोका तोबो ओज़ाए ओज़गै गेरँःके। नत ज़ परमेस्वरए ओसत सोनो गेल्योदा उयुँ ओय़ालो ब रँःके। 15 नोए उज्जूनी यूहन्नाए चोइस क्रिद, “आवए उज्जूनी ज़ जेलाई ड़ादाकिन है डादाचिज़्याव, ‘डाछीनी हुव डाकिन घ्योःव लिज़्या, काराव ल्यो ताकिन नो डाकिन ड़ादाकिन ज़ उलिज़्याव,’ ” है लिद गोहाई याएक्यो। 16 होए ओक्याँनी ज़ गे परमेस्वरए उयुँलाव भरी दैद असिकए तर्त असिक गेदैके। 17 ड़ादा मोसाए ल्योनी परमेस्वरए ओकानुन गेदैके, आज्याल फरी परमेस्वरए उयुँ ओय़ालो सोनो साचो ओपाँ येसु ख्रीसनी गेदैके। 18 परमेस्वरलाई खर्क ज़ सुए ज़ मारँःर, ओबाबुए उयुँ स्याताव तोबोका तोबो ओज़ाए ओक्याँत ज़ सतैसिउ लिज़्या।

रील सछैँज़्याव यूहन्नाए ओयेन

(मत्ती ३:१-१२; मर्कूस १:१-८; लूका ३:१-१८)

19यरूसलेम सहरनिकाव यहूदीराए यासकाव पुजारीर सोनो लेबीरालाई यूहन्नालाई, “नँ सु?” है दानाव यारापरीक ते, 20 यूहन्नाए माम्मोसिद, “परमेस्वरए उपरीज़्याव ख्रीस डा माःक,” है ओरादोक ते, 21 “हुकी नँ सुकी, सँ एलिया रो?” है यादोक ते, “अहँ, डा हो माःक,” है यादोक्यो। “हुकी नँ नो परमेस्वरए ‘अगमबक्ता तोबो डापरीरिज़्या’ है उलिज़्याव मिँ रो?” है यादोक ते, फरी ब, “डा हो ब माःक,” है यादोक्यो। 22 “हुकी नँ ज़ गेलाई है दाव ताके, नँ सु? गेलाई परीज़्यावरालाई नज्जूनी गे है दाव ज़ परिके,” है यादोक ते, 23 यूहन्नाए, “डा यसेया अगमबक्ताए सर्द ओनेज़्याव मिँ ज़। नोए

डाजूनी ओसरो आव ज़ —

‘तोबोए ओर्गा बनल अइ लिद उक्किज़्याव थासरिज़्या,
हुरिज़्याव प्रभुए ओयेम गाँत्या गुँतीलाई सदाँचिके,’ ”
है यादोक्यो।

24नो पजैना हुवर फरिसीराए यारापरींवर याल्यो। 25 नोराए फरी ब
यूहन्नालाई, “नँ ख्रीस ब माःक, एलिया ब माःक, नो अगमबक्ता
ब माःक ताकिन, नँ काराव मिँरालाई रील नरासछैँज़्याव?” है
यादोक ते, 26 यूहन्नाए, “डा ते रील डारासछैँज़्या, खाली जेखाल
ज़ तोबो लिज़्या, होलाई जे जेमासरेसे। 27 नो ज़ डाछींनी हुरिज़्या
है डालिज़्याव मिँ। डा ते नोए ओपोलाए ओचें पलान्या स्यासो ब
डामाले,” है यादोक्यो। 28 आव पाँ भरी यूहन्नाए ओरासछैँज़्याव
यर्दन भै होफताव बेथानिया यादोज़्याव पोल ज़ ताके।

येसु परमेस्वरए ओपाथा

29हो पराःती येसु ओल्योदा उहुज़्याव रँःद यूहन्नाए प्राइँलाई है
यादोक्यो, “चिऊचिके, नो ज़ आव मानुवातावराए यापाप हाइद
ख्याद्याज़्याव परमेस्वरए ओपाथा। 30 नोए उजूनी ज़ डादाकिन
है डादाचिज़्याव, ‘डाछींनी तोबो हुरिज़्या। नो डाकिन डादा
ज़ उलिज़्यावए डाकिन घ्योःव लिज़्या।’ 31 नोलाई डा मनी
डामासरेस्ताव। हितावत मनी नोलाई इस्राएलीराए खार्नी पलेःद
सतैँद्यान्याए जूनी रील डारासछैँज़्या।”

32यूहन्नाए नोरालाई अइ लिद गोहाई याएक्यो, “डा परमेस्वरए
उपुरूस कुइतम मिताव नमतिन भुहुँद ओक्याँत उचुसिज़्याव
डारँःके। 33 नोलाई डानी ते डामासरेस्ताव, खाली डालाई रीनी
सछैँव परींज़्यावए है दाँक्यो, ‘जोए ओक्याँत परमेस्वरए उपुरूस
हुद उचुसिउ नरँःज़्या, होए ज़ परमेस्वरए छैँव उपुरूसनी मिँरालाई
यासछैँरिज़्याव।’ 34 है जैद आव डामीए डारँःवनी ज़ जेलाई आव

ज परमेस्वरए ओजा लिद थरैद डायार्चिके।”

यूहन्नाए उसिसनी येसुस निबाव

35 हो परा:ती फरी यूहन्ना नेब्लो उसिसनिस हो पोक ज च्याँ:सिद यालिज्याक, 36 यूहन्नाए येसुलाई याङ्गलाव घ्याँ ओबाज्याव रँ:द उसिसनिलाई, “चिऊचिन्के, नो ज परमेस्वरए ओपाथा,” है उनिदोक ते, 37 नोनी नो पाँ थैद येसुए उछींत बाकिनी। 38 येसु उछींदा ओभाल्सिक नोनिलाई उछीं उछीं निहुज्याव रँ:द, “जिन काता जिन्खिमज्याव?” है उनिदोक ते, नोनी, “गुर्बा, नँ काङ्क नलिज्याव?” है निदोक ते, 39 येसुए, “हुद चिऊचिन्के,” है निदोक्यो। नोनी उछीं उछीं बाद उलिज्याव पोक ज बाद हो छयाम ओलस ज लिकिनी। नो याकेसो रिमदाडाव चार बजेवाक ओल्यो। 40 नो यूहन्नाए ओपाँ थैद येसुए उछींत बावनी तोबो सिमोन पत्रुसए ओभाइ अन्द्रियास ओल्यो। 41 नो ननी बाद ओदाज्यु सिमोनस दैसिद, “गिन मसीहलाई गिन्दैके,” है दोक्यो। (हिब्रू खामनी मसीहए ओअर्थ ‘ख्रीस’।) 42 नकिन ओदाज्युलाई ब येसुए ल्योक लाँक्यो। येसुए नोलाई लँ लँ चिऊद, “नँ यूहन्नाए ओजा सिमोन ज, आकिनी नमिन केफास नैद डाईज्या,” है दोक्यो। (ग्रीक खामनी केफासए ओअर्थ ‘पहर’।)

फिलिप सोनो नथानेलनी

43 हुकिन हो परा:ती येसु गालीलदा बान्या युँ दाद होदा ओबाज्याक फिलिपलाई रँ:द, “नँ डास हुन्के,” है दोक्यो। 44 नो फिलिप, अन्द्रियास सोनो पत्रुसनी निलिज्याव बेथसेदा नाखारलाव मिँ ओल्यो। 45 नो फिलिपए फरी नथानेलस दैसिद नोलाई, “गे मोसाए ओकानुनल सोनो अगमबक्ताराए धर्मसास्त्रलाव सर्द यानैज्याव मिँस गेदैसिके — नो ते योसेफए ओजा नासरतलाव येसु ची ओल्यो,” है दोक्यो। 46 हा:त ज नथानेलए, “निताव नासरतनी सु ची चाव उहुरिज्याव?” है ओदोक ते, फिलिपए, “नँ ज हुद चिऊके,”

है ओदोक ते, ⁴⁷ नथानेललाई ओल्योदा उहुज्याव रँ:द, येसुए नोए उजूनी नक लिज्यावरालाई, “चिऊचिके, नो साचो इस्राएली, ओखत माल्यो मिं,” है ओरादोज्याव ⁴⁸ नथानेलए थैद येसुलाई, “डालाई कै जैद नसरेस्नाव?” है ओदोक ते, येसुए, “फिलिपए नँलाई ओमाखुल्निद नेभारा सीं खँक नलिज्याक ज़ डारँ:निउ,” है दोक्यो। ⁴⁹ हा:त ज़ नथानेलए, “गुर्बा, नँ साचो ज़ परमेस्वरए ओज़ा, इस्राएलीराए राजा ज़ नल्यो,” लिद है ओदोक ते, ⁵⁰ येसुए, “काता नेभारा सीं खँक डारँ:निउ है डालाई नयुँ उहुबो रो? साचो ज़ छीनी आवकिन घ्यो:व घ्यो:व डायेनर ब रँ:न्या नले,” है दाद, ⁵¹ फरी प्राईलाई है यादोक्यो, “डा जेलाई साचो है डादाचिज्या, जे तछा नम फैसिउ स्रोनो ननी परमेस्वरए ओचाकर्यार डा मिं मिन्सिउए डाल्योक हुव येन बाव येन यादोज्याव रँ:न्या जेले।”

2

येसुए रीलाई दाखमद्य ओजैव

¹ गालीलल याहुव स्रोलात काना यादोज्याव नाखारल तोबो बिह्या ओल्यो। येसुए ओआमा ब नक ज़ उलिज्याव। ² येसुलाई ब उसिसरास नो बिह्यालाव भत्यारल याराखुल्केर। ³ नो बिह्याल याओज्याव दाखमद्य ओखेमोत येसुए ओआमाए येसुलाई, “नलाव याओज्याव दाखमद्य खेम्द ले,” है ओदोक ते, ⁴ येसुए ओआमालाई, “अ माँ, आव येनत डालाई है तादाँयो, डाबेला माताताए,” है दोक्यो। ⁵ नकिन येसुए ओआमाए नक लिज्याव नोकोररालाई, “येसुए जो है दाचिज्याव, हो ज़ दोच्यो,” है यादोक्यो। ⁶ हा: बेलाक नल यहूदीराए याचलन मिताव चोखोइसिन्या री नैन्या दस पन्ध्र सेमे बाज्याव लुँए घागरीर छ गोता यारानैज्याव। ⁷ येसुए नलाव येन दाज्यावरालाई, “आव घागरी भरिल री तसी तसी जैचिके,” है ओरादोव प्राईना नोराए घागरी भरी यारासब्याल्केर। ⁸ हा:त

ज़, “आव री आनी तुपुरू क्योःद भतयारलाव येन चलैजूयावलाई लाँदिचिके,” है ओरादोक ते, नोराए लाँदिकेर। ⁹ नो येन चलैजूयावए नो दाखमद्य जैसिउ री ओदारक, आः डमो दाखमद्य कातानी ओताव लिन्या मासैक्यो। नो ताव री गपूजूयावराए वाज़ यासैजूयाव। है जैद नो येन चलैजूयावए ब्याहोल्यालाई खुल्द, ¹⁰ “उपुर्कावराए ते चाव दाखमद्य भरी ड़ादा ज़ भाःजूयार, ओपाहुनाराए कुधु याओवत वाज़ जाँ छ्यावाकाव याराएजूयार। नँ ते प्राइरानी चाव छींङ पै साँचिद ननैजूयाव ओल्यो,” है दोक्यो।

¹¹ येसुए आव प्राइरानी उसंक्ताव ओसरेस गालीललाव काना नाखारल सतैक्यो। निताव अचम्बलाव ओसक्तीर रँःद उसिसराए येसुलाई यायुँ हुपके। ¹² नकिन येसु ओआमा, ओभाइ सोनो उसिसरास कफर्नहुम सहरल बाद जाँवा पै लिकेर।

येसुए बेपारीरालाई ध्यान झिमनी ओरापलेःव

(मत्ती २१:१२-१७; मर्कूस ११:१५-१९; लूका १९:४५-४६)

¹³ नाः बेलाक यहूदीराए निस्तार पर्व हुनाद उलिजूयाव। नोए उजूनी येसु यरूसलेमदा बाके। ¹⁴ यरूसलेमलाव ध्यान झिमल मिँराए घेर, बेधार, परिवार योःव ज़ यारानैजूयाव सोनो पैसा तोजूयावर ब नल चुसिद यालिजूयाव रँःद, ¹⁵ येसुए उकुइत तोबो चें रैद कोर्ता जैद नो ध्यान झिमलाव लँःजूयावर योःजूयावरालाई रीःद याबेधा याघेँरास यापलेःक्यो। पैसा तोजूयावराए यातेबलर पलतैद्याद यापैसार सोभोद याएक्यो। ¹⁶ परिवा योःजूयावरालाई, “जे जेसमानरास आनी पुलुसूद बाचिके। आव डाबाबुए उझिमलाई काराव जे पसल जेजैजूयाव?” है यादोक्यो। ¹⁷ हाःत ज़ उसिसराए नो धर्मसासूत्रलाव सर्सिउ पाँलाई चेतैकेर। नलाव सर्सिउ आव ज़, “अ परमेस्वर, नझिमए जूँनी डादोजूयाव ध्यावनाए डायुँल मेंः

माँ:ती चाँ:जूया।”

18ना:त ज़ यहूदीराए यासेरराए येसुलाई, “नँ इताव येन दान्या परमेस्वरनी नदैव ताकिन गेलाई तोबो सरेस सतैद्याव ताके,” है यादोक ते, 19 येसुए, “जे आव ध्यान झिमलाई तै:चिकेदा, डा स्रोलात सोचोइन्या डाले,” है ओरादोक ते, 20 नोराए, “आव ध्यान झिमलाई छयालीस बर्सत गेजैके, कै जैद नँ स्रोलात नसोचोइधुरिजूयाव?” है दोकेर। 21 खाली नो ध्यान झिम ते येसुए ओल ओक्याँ उजूनी है ओरादोव ची। 22 येसु सिउनी ओसोवत वाज़ उसिसराए नो है ओरादोव भरी याका दोकेर। ननी ज़ नो धर्मसास्त्रलाव सर्सिउ पाँ सोनो येसुए ओपाँव पाँ भरी थरैद पतिकेर।

कुधुए येसुलाई यायुँ उहुबो

23निस्तार पर्व उहुवत येसु यरूसलेमल उलिजूयाक, अचम्बलाव ओदोव येनर रँ:द नलाव मिँर कुधुए येसुलाई यायुँ हुप्के। 24 हैदी ब ओल येसुए मिँराए यायुँलाव पाँ भरी ओसैजूयावए नोराए याभर मादोक्यो। 25 सुए ज़ येसुलाई ‘आव मिँ इताव लिजूया’ है दाव ओमापरिजूयाव, ओल ज़ प्राइँए युँलाव पाँ ओसैजूयाव।

3

येसुए निकोदेमसलाई है ओदोव पाँ

1यहूदीराए घ्यो:व याकचरीलाव निकोदेमस यादोजूयाव फरिसी तोबो उलिजूयाव। 2 नो मिँ रील अलगज़ा येसुए ल्योक हुद, “गुर्बा, नँ परमेस्वरए ल्योनी गे मिँरालाई परमेस्वरए ओपाँ पैना हुव ज़ लिन्या गेसैजूया। नँस परमेस्वर ओमाल्यो ताकिन नँ निताव येनर कातानी नदोधुरिजूयाव,” है ओदोक ते, 3 येसुए, “नँलाई साचो है डादींजूया, मिँ सा:रोल ओमाजर्मिवा पै परमेस्वरए ओराजूया मारँ:धुव,” है दोक्यो। 4 निकोदेमसए फरी, “मिँ सेर्द कै जैद फरी

उजर्मिज्याव? सैं फरी ओआमाए उफूल पसिद उजर्मिज्याव?” है ओदोक ते, ⁵ येसुए, “फरी साचो है डादीज्या, जो मिँ रीनी सोनो परमेस्वरए उपुरूसनी माजर्मिए, नो मिँ परमेस्वरए ओराज्याल मापसिधुइ। ⁶ है जैद मिँनी जर्मिज्याव मिँ ज़ ताज्या, परमेस्वरए उपुरूसनी जर्मिज्याव परमेस्वरए उमीं ज़ ताज्या। ⁷ डा नँलाई, ‘साःरोल जर्मिउ ताके,’ है डादीवनी अचम्ब तातानी। ⁸ बतास मनी जोदा बान्या उयुँ लिज्या, होदा ज़ बाज्या। नोए ओर्गा ते थासज्या, खाली कातानी उहुज्याव, काना ओबाज्याव लिन्या सुए ज़ मासैर। परमेस्वरए उपुरूसनी जर्मिज्यावर ब हितावर ज़ ताज्यार,” है दोक्यो।

⁹हाःत ज़ निकोदेमसए, “आव नपाँज्याव कै जैद ओताज्याव?” है ओदोक ते, ¹⁰ येसुए, “नँ इस्राएलीराए यागुर्बा ताद ब नाः कै जैद नमासैज्याव? ¹¹ डा नँलाई साचो है डादीज्या, गे जो गेसैज्या हो ज़ गेपाँज्या, जो गेरँःज्या हो ज़ गेरासथैज्या। खाली डा डासैव डारँःव भरी है डादाचिक जे जेमापतिनाए। ¹² आव मानुवाताव पाँ है डादाचिक जेमापतिनाकिन, स्वर्गताव पाँ है डादाचिक झन कातानी जेपतिरिज्याव? ¹³ स्वर्गनी हुव डा मिँ मिन्सिउकिन आव मानुवानी स्वर्गत बाव सु ज़ माले। ¹⁴ किताव मोसाए बनल पितले घुल जैद तङ्गैद ओरायो, हिताव ज़ डा मिँ मिन्सिउ ब तङ्गैसिउ परिरीज्या। ¹⁵ है जैद जो जोराए डालाई यायुँ हुपुज्या, हो होराए अजम्बरी जुनी दैन्या लेर।

¹⁶“परमेस्वरए आव मानुवाताव मिँरालाई उयुँ नाद तोबोका तोबो ओज़ा ब याएक्यो। है जैद जोए नो ओज़ालाई उयुँ हुपुज्या, नो कै मै माताद अजम्बरी जुनी दैन्या ले। ¹⁷ परमेस्वरए ओज़ालाई मानुवाताव मिँरालाई खेमून्याए जूनी उपरीव माःक, बुरू मानुवाताव

मिँरालाई बाँचैनुयाए जूँनी उपरीं व ची। 18 है जैद जोए ओज़ालाई उयुँ हुपूज़्या, होए परमेस्वरए ओसजा दैनुया माले। फरी जोए परमेस्वरए ओज़ालाई उयुँ माहुबे, होए तोबोका तोबो परमेस्वरए ओज़ालाई उयुँ ओमाहुबोए ज़ परमेस्वरनिकाव सजाल परिधुके। 19 परमेस्वरए मिँरालाई ओराफालूज़्याव आनी ज़ तारिज़्या — आव मानुवाल ओज़ाए ओक्याँत ज़गै जैद नैव। मिँर ते झन यायेन माचाव ओतावए नो ज़गैलाई देखा चुम चुमोलाई यामन लागिके। 20 जोए माचाव येन दोज़्याव, होए ज़गैवलाई सोद ‘डापाहा बाया’ लिद ओछ्याचेए ज़गैवदा माहुइ। 21 फरी जोए साचो येन दोज़्याव, होए ‘डाय़ेन भरी परमेस्वरनी ज़ ताव घरैःक’ लिद ज़गैवदा हुज़्या।”

रील सछैँज़्याव यूहन्नाए येसुए उजूँनी ओपाँव

22 आव भरी ओतावत येसु उसिसरास यहूदिया खन्दल बाद नोरास जाँवा पै नल ज़ लिद नलाव मिँरालाई ब रील यासछैँक्यो। 23 यूहन्नाए मनी सालीम छचोकाव एनोन यादोज़्याव पोक ओरासछैँज़्याव, काराव ल्यो ताकिन नक री सर्बा ज़ उलिज़्याव। मिँर ओल्योक हुद रील यासछैँसिज़्याव। 24 हाःक पै यूहन्नालाई झ्यालखानाल यामाझाःताव।

25 नो बेलाक ज़ यूहन्नाए उसिसर तोबो यहूदीस सछैँसिनुयाए जूँनी याखर्लेसिज़्याव। 26 नोर यूहन्नाए ल्योक हुद, “गुर्बा, यर्दन भै होफताव नँस लिज़्याव सतैद नयासिउ मिँए ब रील यासछैँज़्याव। झन प्राइँ होए ओल्योक ज़ बाज़्यार,” है यादोक ते, 27 यूहन्नाए, “परमेस्वरए ओमाएकिन सुए ज़ काता ज़ मादैधुव। 28 नोए उजूँनी डापाँव पाँ जे ब थैद जेनै। हाःक ज़, ‘डा ख्रीस माःक, डा ते होए ओड़ा ओड़ा परींसिउ मिँ,’ है डादाचिउ ची। 29 किताव बिह्याल लुज़ालाई लाँज़्याव ब्याहोल्या ताज़्या, सोनो ब्याहोल्याए ओलापूक च्याँःसिज़्यावए ओनै ब्याहोल्याए ओर्गा थैद रेंज़्या, हिताव ज़ डा मनी आव पाँर थैद डायुँ होलाँ ताज़्या।

30 ओल झन यादा ज्ञ तानाव परिज्ञया, डा ते मेदा ज्ञ तानाव परिज्ञया।
 31 “रूतिन हुव प्राईए तर्ताव ज्ञ ताज्ञया। आव मानुवाताव मिँर ते मानुवानी ज्ञ ताद मानुवाताव पाँ ज्ञ दोज्ञयार। स्वर्गनी हुव प्राईए डैताव ज्ञ लिज्ञया। 32 नोए स्वर्गताव ओथैव उरैःव भरी प्राईलाई ज्ञ ओरासथैक ओपाँ सुए ज्ञ मापतिर। 33 ओपाँ भैःज्ञयावर ते परमेस्वर साचो ज्ञ लिज्ञया लिद यासही छाप याझाःव मिताव ज्ञ लिज्ञया। 34 काराव ल्यो ताकिन परमेस्वरए उपरींव मिँ परमेस्वरए ओपाँ वाज्र पाँज्ञया। नोए ओक्याँत परमेस्वरए ओल उपुरूस मागोईँद धोल पोगोल ज्ञ थुदिज्ञयाव। 35 है जैद स्वर्गताव ओबाबुए ओजालाई मया दाद प्राई उकुइत ज्ञ याद नैव। 36 जो जोराए ओजालाई यायुँ हुपज्ञया, नोर अजम्बरी जुनी दैन्यार ताज्ञयार। फरी जो जोराए ओजाए ओपाँ माभैःर, नोराए अजम्बरी जुनी दैन्या मालेर, झन परमेस्वरए उरिस चोवर ताज्ञयार,” है यादोक्त्यो।

4

येसु सामरी मेंमास ओपाँव

1 रील सछैँज्ञयाव यूहन्नाकिन येसुए मिँर कुधु ओल्योदा जैद रील यासछैँज्ञयाव दी लिन्या फरिसीराए थैकेर। 2 हैदी ब सछैँज्ञयाव ओल येसुए ते माःक, उसिसराए ची। 3 है जैद येसुए निताव पाँ सैद यहूदियालाई रासूद डादाडाव उलिज्ञयाव गालीलदा ज्ञ बाके। 4 नदा बान्या सामरिया खन्दलाव घ्याँ बाव उपरिज्ञयाव। 5 नलाव घ्याँ ओबाज्ञयाक सामरियालाव तोबो सुखार यादोज्ञयाव नाखारल हुके। नो नाखार याकूबए ओजा योसेफलाई ओयो पो छचोक उलिज्ञयाव। 6 नक याकूबए ओघोव कुवा ब उलिज्ञयाव। है जैद येसु बाद बाद बनै उथलिउए अधमर लावाक नो कुवाक नासिके। 7 हाःत ज्ञ सामरियालाव तोबो मेंमा री गपना हुके। येसुए नोलाई, “डालाई री तुपुरू ओन्या याव ताके,” है दोक्त्यो। 8 नो बेलाक

उसिसर नाखार जीदा ज्ञयान्यार लें:ना बाद यालिज्ञयाव। 9 नो मेंमाए येसुलाई, “नँ यहूदी ताद कै जैद डा सामरी मेंमाए डाकुइताव री ओव नपैज्ञयाव?” है दोक्यो। हा: बेलाक यहूदीर सामरीरास काता सर्यो ज़ यामानैज्ञयाव।* 10 येसुए नोलाई, “परमेस्वरए नँलाई याव ओपैज्ञयाव ब नमासैए, नँस री निज्ञयावलाई ब नमासरेसे। होलाई नसरेसो ताकिन नँ ची होस निन्या नल्यो। होए नँलाई जींदो री यान्या ओल्यो,” है ओदोक ते, 11 नो मेंमाए, “प्रभु, नँस री गपून्या जा ब माले, कुवा ब बनै पतालल लिज्ञया। कातानी नो जींदो री नयाँरिज्ञयाव? 12 आव कुवा ते गेपुर्खा याकूबए ओघोव ची। आव कुवानी ज़ ओज़ार सोनो ओहार बेधाराए री याओज्ञयाव। काता नँ याकूबकिन ब घ्यो:व नलिज्ञयाव रो?” है ओदोक ते, 13 येसुए, “आव कुवानी री ओज्ञयाव फरी ब छोसून्या ले। 14 डा डाराएज्ञयाव री ओज्ञयावर ते खर्क ज़ छोसून्या मालेर। बुरू नो री नोए ओक्याँत परीज्ञयाव रीमुल स्यासो तान्या ले। नोए ज़ अजम्बरी जुनील सकेसून्या ले,” है ओदोक ते, 15 नो मेंमाए, “हो ची ताकिन्दा प्रभु, डालाई नो री याव ताके। डा फरी खर्क ज़ री ब छोसून्या डामाले, गण्हुव ब परिन्या माले,” है दोक्यो।

16नकिन येसुए नोलाई, “नँ नझिमक बान्केदा, नरेलाई खुल्द रैके,” है ओदोक ते, 17 नो मेंमाए, “डा डारे ज़ माले,” है ओदोक ते, येसुए, “‘डारे माले’ है नलिज्ञयाव ते साचो ज़। 18 नरेर पाँच जना ताधुकेर। आज्याल नँस लिज्ञयाव ब नरे मा:क। नो नपाँ ते साचो ज़,” है दोक्यो। 19 नो मेंमाए, “प्रभु, नँ ते अगमबक्ता ची नल्यो लिद डसरेसुनिके। 20 गे सामरीराए गेसाखा पुर्खाराए भा:किन ज़ आव दाँदात पुजा दोहुकेर। जे यहूदीर ते ‘परमेस्वरए उपुजा यरूसलेमल वाज़ दान्या ताए’ है जेलिज्ञया,” है ओदोक ते, 21 येसुए

* 4:9 4:9 छुत बुझिन्या – यहूदीर सोनो सामरीर यामाछुसिज्ञयाव। 4:9 4:9 एज़ा ४:१-५; नहे ४:१-२

नोलाई, “अ माँ, डालाई पतिनायो, तछा स्वर्गताव डाबाबुए ओसेवा आव दाँदात सोनो यरूसलेमल वाज्र तान्या माले। ²² जे सामरीराए परमेस्वरए ओसेवा मासैद ज़ जेदोज़्या, गे ते सैद ज़ गेदोज़्या। बाँचिन्या येम यहूदीराए ल्योनी वाज्र ताज्या। ²³ खाली तोबो बेला हुज्या, नो हुद ब ले। नो बेलाक साचोस परमेस्वर बाबुए ओसेवा दोज्यावर साचो युँनी ज़ दान्या लेर। परमेस्वर बाबुए ओसेवा दान्यार नितावर ज़ याखिमज्याव। ²⁴ परमेस्वर ते पुरूस ज़। है जैद ओसेवा दोज्यावराए साचो युँनी ज़ दोज्यार।” ²⁵ हाःत ज़ नो मेंमाए, “स्त्रीस यादोज्याव मसीह हरिज्या लिन्या डालैज्या। हो हुद आव पाँ भरी ओपोःस ज़ गेलाई पलासद्यान्या ले,” है ओदोक ते, ²⁶ येसुए नोलाई, “नँस पाँज्याव डा हो ज़,” है दोक्यो।

येसुलाई उसिसराए ज़्यावर रैद यायो

²⁷ हाःत ज़ येसुए उसिसर नाखारनी केसहुकेर। येसु तोबो मेंमास ओपाँज्याव रँःद अचम्ब ताकेर। खाली येसुलाई, “काता नखिमज्याव, काताए जूँनी जिन्पाँज्याव?” सुए ज़ है मादोधुकेर। ²⁸ हुकिन नो मेंमाए ओघागरीर ख्यानैद नाखारदा बाद नलाव मिँरालाई, ²⁹ “हुचिके, तोबो मिँलाई गेचिऊना। होए डालोव येन भरी ज़ है दाँक्यो। सैँ स्त्रीस नो ज़ ओताव?” है ओरादोक ते, ³⁰ नो नाखारलाव मिँर ननी पुलुसुद येसुए ल्योक बाकेर।

³¹ नो मिँर येसुए ल्योक यामाकेसहुद ज़ उसिसराए, “गुर्बा, आव गेरैव ज़्यावर ज्युके,” है यादोक ते, ³² येसुए, “जे जेमासैज्याव ज़्यावर डाल ज़ लिज्या,” है ओरादोक ते, ³³ उसिसर या याल, “सुवाराए ओललाई ज़्यावर रैद यायो सैँ?” है यालिज्याव थैद, ³⁴ येसुए नोरालाई, “डा डालाई परीज्याव उयुँलाव मिताव येन दाद, ओयेन सयोःन्या ची। ³⁵ जे है जेलिज्या, ‘एँःलाव गेझाःव धुर चार मैना छीनी वाज्र क्यान्या ताज्या।’ डा ते है डालाचिज्या, एँःदा

भाल्सिचिके, क्याऱ्या बेला ताद ले।³⁶ आख मनी नो क्याऱ्यावए ओजेला दैऱ्याव, ओदोव येन मनी अजम्बरी जुनी पै रहिन्या ले। है जैद वासूऱ्याव सोनो क्याऱ्यावनी तछा सिप ज़ रेन्या लिनी।³⁷ याझाऱ्याव आहाती साचो ज़ थंरिऱ्या — ‘तोबोए वासूऱ्याव, तोबोए क्याऱ्याव।’³⁸ हिताव ज़ डा मनी जेलाई जे काता ज़ जेमादोव पोल क्याऱ्या परींद डानैचिए। छुतराए यादोव येननी जेजुँ दैन्या जेले,” है यादोक्यो।

सामरियालाव मिँर कुधुए यायुँ उहुबो

³⁹नो सामरी मेंमाए नो नाखारलाव मिँरालाई, “येसुए डा डोदोव येन भरी पाईं ज़ पाँद्याँक्यो,” है ओरादोवए नलाव सामरीर कुधुए ज़ येसुलाई यायुँ हुपके।⁴⁰ है जैद येसुए ओल्योक हुद, “नँ गेस ज़ ल्यो ताके,” है यादोक ते, येसु यास ज़ नेला लिके।⁴¹ नोर येसुए ओपाँ थैद झन कुधुए ज़ यायुँ हुपके।⁴² नो मेंमालाई, “अब ते नँ नपाँ थैद वाज़ माःक, आव गेर्नाए ज़ ओपाँ थैद, ‘आव ज़ ओल्यो मानुवाताव मिँरालाई बाँचैना हुव ख्रीस’ लिन्या थरैद गेयुँ हुपके” है दोकेर।

येसु गालीलदा ओबाव

⁴³येसु नल ओल्यो नेला ओतावत ननी पुलुसूद गालीलदा बाके।⁴⁴ ओल येसुए मनी है उलिऱ्याव, “अगमबत्तलालाई ओनाखारलाव मिँराए सुए ज़ ओमान नैद माएर।”⁴⁵ येसु गालीलल उहुवत नलावराए ओमान नैद्याद चावस नैकेर। नलावराए डादा यरूसलेमलाव पर्वत येसुए ओदोव येन भरी रँःद यानैऱ्याव।

येसुए कर्मचारीए ओज़ालाई ओसगराँव

⁴⁶येसु फरी गालीललाव काना यादोऱ्याव नाखारल हुके। नल ज़ डादा रीलाई दाखमद्य ओजैव। नाः बेलाक ज़ राजाए तोबो ओकर्मचारीए ओज़ा कफर्नहुम सहरल ओजोरो उहुऱ्याव।⁴⁷ है जैद नो कर्मचारीए, ‘येसु यहूदियानी गालीलल हुद ले दी’ लिन्या थैद, येसुए ल्योक बाद सिउ पैऱ्याव ओज़ालाई सगराँन्याए जूनी ओलस

लाँव ओपैँजूयाक, ⁴⁸ येसुए नोलाई, “जे सरेसर सोनो अचम्बलाव येनर जेमार्ःवा जेमापतिए,” है ओदोक ते, ⁴⁹ नो कर्मचारीए, “प्रभु, डाज़ा उस० ओमाफ्यान्द तखेप हुद्याव ताके,” है दोक्यो। ⁵⁰ नाःत ज़ येसुए नोलाई, “बान्के, नज़ा गराँधुके,” है ओदोव प्राइँना नो मिँ उयुँ हुपुद उझिमदा बाके। ⁵¹ नो ओबाज़याक ज़ ओनोकोरर झिमनी ओलस दैसिहुद, “नज़ा गराँधुके,” है यादोक ते, ⁵² होए, “नो खा बेलाकिन ओगराँव?” है ओरादोक ते, “आझ्यो लाकाव एक बजेकिन ओजोरोए रासूक्यो,” है दोकेर। ⁵³ नाःत ज़ नो कर्मचारीए, “येसुए डालाई ‘नज़ा गराँधुके’ है ओदाँव बेला ब नाःक ज़ ओल्यो,” लिन्या सैक्यो। है जैद ओल सोनो उझिमलावरास येसुलाई यार्युँ हुपुके। ⁵⁴ येसु यहूदियानी हुद गालीलल अचम्बलाव येन ओदोव आवस नेखेप ताके।

5

येसुए नासिन्या छचाम मिँलाई ओसगराँव

¹नकिन यहूदीराए पर्ब तोबो उलिज़याव। होए उजुँनी येसु ननी पुलुसुद यरूसलेमदा बाके। ² यरूसलेम सहर बारिसिउ भार्नानी पुलुसुन्या तोबो ‘बेधा ग्राम’ उलिज़याव। होए ओडाक तोबो दह उलिज़याव। नोलाई हिब्रू खामनी ‘बेथेसुदा’ है यादोज़याव। नो दह घवाँगिल पाँच गोता छान्या झाःसिउ उलिज़याव। ³ नल याजोरो हुवर, याखँ याकुइ सिउर, काना दूँदाराए [री खा बेलाक छल्किके लिद कींद यानेज़याव। ⁴ नो दहल कैताक कैताक परमेस्वरए ओचाकर्या हुद री ओचलैज़याव। नो री ओचलैव बेलाक जो डात नो दहल पसिज़या, हो जो मिताव बेथा उलिदी ब ओगराँजूयाव।]

⁵नल अरतीस बर्स भरी ओजोरो हुव तोबो मिँ उलिज़याव। ⁶ येसुए नोलाई घ्याँसिद उलिज़याव रँःद, ‘आव ते कुधु बर्स ची ताके’ लिन्या सैद नोलाई, “नँ सगराँसिउ नपैँजूयाव रो?” है ओदोक ते, ⁷ नो ओजोरो हुवए, “प्रभु, सगराँसिउ ते डापैँजूया। खाली री उछल्किक

डालाई दहल सुए ची झाःनाव केदा? डा धो धो डाबाजूयाक ज़ डालाई बलेद छुत पसिज़्या,” है ओदोक ते, 8 येसुए, “डा नँलाई है डादींज़्या, च्याँःसिद नतैर सिम्द बान्के,” है ओदोक ते, 9 बेहार ज़ नो मिँ गराँद ओतैर सिम्द बाके।

नो छचाम नासिन्या छचाम ओल्यो। 10 है जैद यहूदीराए यासेरराए नो गराँवलाई रँःद, “आछिम नासिन्या छचाम ची, नँ इताव गुर घुर्न्या माताए,” है यादोक ते, 11 नो गराँवए, “डालाई सगराँज़्यावए ज़, ‘नतैर सिम्द बान्के,’ है ओदाँव ची,” है ओरादोक ते, 12 “नँलाई निताव है दाज़्याव सु?” है दोकेर। 13 खाली नो गराँव मिँए ओललाई सगराँज़्यावलाई ब ओमासरेसूज़्याव। नो बेलाक मिँर बनै काला मुलु यातावए येसु ड़ादा ज़ ननी पुलुस्द ओबाधुव ओल्यो। 14 छींनी येसुए नो गराँवलाई ध्यान झिमल रँःद, “नँ आख ते नगराँके, आकिनी फरी पाप तादोयो, मानी झन ज़ माचाव तान्या नले,” है ओदोक ते, 15 नो मिँ झन ननी पुलुस्द बाद यहूदीराए यासेररालाई, “डालाई सगराँव ते येसु ची ओल्यो,” है यादोनाक्यो।

16 येसुए नासिन्या छचाम मनी निताव येन ओदोवए यहूदीराए यासेरर नाःकिन ज़ उखिरी पसिनाकेर। 17 येसुए फरी नोरालाई, “डाबाबुए आःपै ओयेन दाव ज़ नैज़्याव। है जैद डा मनी डादोज़्या,” है यादोक्यो। 18 नो पाँ थैद नोर झन ज़ मचिद, “आवए ‘नासिन्या छचाम येन दान्या माताए’ लिन्या कानुनलाई वाज़ ओख्याव माःक, परमेस्वरलाई ज़ ‘डाबाबु’ है लिद ओल मनी परमेस्वरस सम सम जैसिज़्या। आवलाई ते सैःव ज़ परिए,” है लिकेर।

येसुए ओदोज़्याव भरी ओबाबुनी वाज़ दोज़्याव

19 येसुए नोरालाई, “डा जेलाई साचो है डादाचिज़्या, डा ओज़्राए डाबाबुए ओदोज़्याव येन डामारँःवा पै डानी काता ज़ डामादोधुइ।

डाबाबुए जोनी दोज्याव, डा मनी हुनी वाज्ज डादोज्या। ²⁰ डाबाबुए डा ओज्जालाई मया दाँज्याव। है जैद ओदोज्याव येन भरी डालाई मनी सतैद्याँज्याव। जे आव जेरःज्यावकिन इन घेपपा येन सतैद्यान्या ले। ननी इन ज्ज अचम्ब तान्या जेले। ²¹ किताव डाबाबुए सिउरालाई सोचोइद जींदो याजैज्याव, हिताव ज्ज डा मनी जोलाई डायुँ लिज्या होलाई अजम्बरी जुनील बान्या डाजैज्या ²² है जैद, डाबाबुए सुए ओयेन ज्ज माफालो, नो फाल्न्या भरी डा ओज्जाए डाकुइत ज्ज याद नैनाव। ²³ ननी ज्ज किताव डाबाबुए ओमान नैद याएज्याव, हिताव ज्ज डा ओज्जाए डामान ब प्राइँए नैद्यान्या लेर। जोए डामान नैद मायाँव, होए डालाई परीज्याव डाबाबुए ओमान ब नैद मायो।

²⁴“डा जेलाई साचो है डादाचिज्या, जोए डापाँ थैद डालाई परीज्यावलाई उयुँ हुपज्या, नोए अजम्बरी जुनी दैद सजाल परिन्या माले। नो मिँ सिउल गनिसिउनी पुलुसूद साःरो जुनी दैन्याल गनिसिज्या। ²⁵ फरी ब जेलाई साचो है डादाचिज्या, नो बेला हुज्या, हुद मनी ले, जोए परमेस्वरए ओज्जाए ओर्गा ओथैकिन, नो मिँ सिउ उलिदी ब साःरोल सैसिन्या ले। ²⁶ किताव डाबाबुए ल्योनी पोहोन ताज्या, डा ओज्जालाई मनी नो पोहोन यान्या जैद नैनाव। ²⁷ है जैद डा ओलनी ज्ज मिँ मिन्सिद डाहुवए मिँरालाई फाल्न्या हक ब डाकुइत ज्ज याद नैनाव। ²⁸ आव डापाँत अचम्ब ताताच्यो। तछा इताव बेला हुरिज्या, खादरल लिज्यावराए मनी डा ओज्जाए डार्गा थैद, ²⁹ सैसिद खादरनी पुलुसून्या लेर। नोरानी चाव येन दाव भरी अजम्बरी जुनील बान्या लेर, माचाव येन दाव भरी सजाल बान्या लेर,” है ओरादोज्याव।

येसुलाई थनैद्याज्याव ओल परमेस्वरए ज्ज

³⁰“डा डानी ते काता ज्ज डामादोधुइ। डाबाबुए ल्योनी किताव

डाथैजूया, हितावनी ज़ डाफालजूया। नो डाफालजूयाव भरी न्यायस डादोज़्या, काराव ल्यो ताकिन नो डादोज़्याव डा डापैजूयावनी माःक, डालाई परीजूयावए ओपैजूयाव मितावनी वाज़ डादोज़्या। 31 डाजूनी डा ज़ डापाँकिन, नो पाँ साचो माथंरिए। 32 डाजूनी पाँद डालाई थनैद्याजूयाव छुत ज़ लिजूया। होए डाजूनी पाँद ओयाँजूयाव भरी साचो थंरिजूया। 33 जे रील सछैजूयाव यूहन्नाए ल्योक मिँर जेरापरीक मनी, नोए ब डाजूनी साचो थंरिउ पाँ ज़ पाँके। 34 हैदी ब मिँनी हुजूयाव पाँनी ते साचो डामाथंरिए। अइज़ जे यूहन्नाए ओरायो गोहाई रैद बाँचिर सैं लिद होए उमिन तखेप डाहाइजूया। 35 यूहन्ना पलाँ जैजूयाव बत्ती स्यासो ओल्यो। जे नोए ओजैव पलाँवल जाँवा पै रेंद जेलिके। 36 खाली डास लिजूयाव गोहाई यूहन्नाकिन ब घेप्पा लिजूया। डाबाबुए डालाई दाव उपरीनाजूयाव येन डा डादोज़्या, आव येनरानी ज़ परमेस्वरए उपरीव ज़ ओल्यो लिद सरेसनाजूया। 37 डालाई परीजूयाव डाबाबुए मनी डाजूनी ओल ज़ पाँद याँजूयाव। जे होए ओर्गा ब जेमाथैताए, ओललाई ब जेमारेंःताए। 38 जे ते झन परमेस्वरए ओपाँ ब जेयुँल जेमानैए, उपरीव ओज़ालाई ब जेयुँ माहुबे। 39 जे अजम्बरी जुनी दैन्याए जूनी धर्मसास्त्रल खिमो ज़ जेनैजूया। नो जेखिमजूयाव धर्मसास्त्रए ज़ डाजूनी गोहाई याचिजूयाव। 40 हितावत ब नो जुनीए उजूनी डाल्योदा हुव जेमाभैःए।

41“डा मिँराए ल्योनी घेप्पा मिन ते डामाखिमे। 42 खाली जे परमेस्वरए ल्योदा जेयुँ ज़ माले लिन्या डासैजूया। 43 डा डाबाबुए उमिननी ज़ हुद डाले, जे ते झन डालाई जेसोनाजूया। छुत सुवार या यामिननी याहुकिन होरालाई ते झन यामानर नैद्याद जेरासुमजूया। 44 जे तोबोका तोबो परमेस्वरए ल्योनिकाव दैन्या मान माखिम्द जे जेल मान खिमजूयावराए कातानी ची परमेस्वरए उपरीवलाई

जेयुँ उहुपरिज्ञ्याव? 45 है जैद तछा परमेस्वर डाबाबुए ओझाक जेगल्ती थरैद्यान्या डा पाँव मापरिए। जे जेखत पलेद्यान्या जेयुँ जेसुहुपज्ञ्याव मोसा ज्ञ तान्या ले। 46 जे मोसाए ओपाँलाई साचो जेयुँ उहुपज्ञ्याव ताकिन डालाई मनी जेयुँ हुपन्त्या ओल्यो। होए डा डाजूनी ज्ञ सर्द ओनैज्ञ्याव। 47 खाली जे होए ओसरो पाँलाई जेयुँ ओमाहुबो प्राईना, डा डापाँत झन कातानी ची जेयुँ उहुपरिज्ञ्याव?”

6

येसुए पाँच हजारलाई भरेस ओरायो

(मती १४:१३-२१; मर्कूस ६:३०-४४; लूका ९:१०-१७)

1 आव पाँ भरी ओतावत येसु गालील दह होफत बाके। नो दहलाई तिबेरियास मनी है यादोज्ञ्याव। 2 येसुए अचम्बलाव येनर ओदोज्ञ्याव, याजोरो हुवरालाई ओरासगराँज्ञ्याव मनी यारँ:ज्ञ्यावए ओल जोदा जोदा बाज्ञ्या मिँर ब उछीं उछीं बनै माहोल्या ज्ञ याबाज्ञ्याव। 3 हो बेलाक येसु उसिसरास तोबो दाँदात बाद चुसिकेर। 4 नो बेलाक यहूदीराए निस्तार पर्व हुनाद उलिज्ञ्याव। 5 येसुए ओल्योदा हुज्ञ्याव माहोल्यार रँ:द तोबो उसिस फिलिपलाई, “गे आव माहोल्यारालाई ज्ञ्यावर कान्नी लँ:द रैद्यान्या?” है दोक्यो। 6 खाली आव पाँ फिलिपलाई जाँचिन्याए जूनी वाज्ज ओल्यो। येसुए ओल दाव ओपैज्ञ्याव येन ते ड़ादा ज्ञ थरैद ओनैज्ञ्याव। 7 हा:त ज्ञ फिलिपए, “आ: कुधुलाई तके तके वाज्ज गेराएदी ब चाँदीए सिक्का नेसयवाए ब थैन्त्या माले,” है ओदोज्ञ्याक ज्ञ, 8 छुत उसिस सिमोन पत्रुसए ओभाइ अन्द्रियासए येसुलाई, 9 “आक तोबो छोर्यास पाँच गोता चिकाए भरेस सोनो नेब्लो डाँ: लिज्ञ्या। खाली ना:काव मिँरालाई काता ची ओतारिज्ञ्याव?” है ओदोक ते, 10 येसुए उसिसरालाई, “नो माहोल्यारालाई बाँल चुसिउ यारापरीचिके,” है यादोक्यो। नल छी खार्ल चुसिन्या पो बनै चाव उलिज्ञ्याव। नो माहोल्यारानी

खेपार वाज्र पाँच हजारा यालिज्ञयाव। 11 नोर याचुसिउत येसुए नो पाँच गोता भरेस रैद धन्याबाद चरैःद 'नो चुसिद लिज्ञयावराए घज्युरक' लिद भाःद याएक्यो। फरी नो नेब्लो डाँःनिलाई मनी हिताव ज़ जैद भाःद याएक्यो। नोराए याफू तसी ज्युकेर। 12 नोर ज्ञयाद यावाँःवत उसिसरालाई, "नो ज्ञयादकाव यासयेलोर तके ब माख्यानैद दुपचिके," है ओरादोक ते, 13 नोराए यासयेलो पाँच गोता चिका भरेसए उकुतुरार यादुपक बाह झुर्नु ताके।

14मिर्राए येसुए इताव अचम्बलाव येनर ओदोव रँःद, "आव मानुवात हुरिज्ञया है यालिज्ञयाव अगमबक्ता साचो आव ज़ ची ओल्यो," है लिकेर। 15 है जैद नोराए येसुलाई करस याराजा जैव यापैज्ञयाव सैद येसु ननी पुलुस्द ओबातड ज़ तोबो दाँदात बाके।

येसु री तर्त तर्त ओबाव

(मत्ती १४:२२-३३; मर्कूस ६:४५-५२)

16नम ओइयानाक येसुए उसिसर दह छचोक झरिद, 17 दोङ्गल पसिद दह होफताव कफर्नहुमदा बाव यापैज्ञयाव। खाली नम इयाद चुम चुम ताद ब येसु ओमाहुवए या वाज्र दोङ्गल पसिद बाकेर। 18 याबाज्ञयाक बनै घयोःव बतास हुद रीलाई बनै ओहलैज्ञयाव। 19 हितावल ज़ यादोङ्गलालाई छ किलोमितरवा यालाँवत येसु री तर्त तर्त याल्योदा उहुज्ञयाव रँःद बनै छेःकेर। 20 हाःत ज़ येसुए, "ताछेःच्यो, डा ची," है ओरादोक ते, 21 नोर यायुँर होलाँ ताद दोङ्गल हुव एकेर। याकेसून्या पोक ब बेहार ज़ केस्केर।

येसु बाँचैज्ञयाव ज्ञयाव ज़

22हो पराःती नो याराख्यानैव माहोल्याराए, 'दह आफत दोङ्गल तोबो वाज्र ओल्यो, नो दोङ्गल ओल येसु ते माबाए, उसिसर वाज्र याबाव' लिन्या यासैज्ञयाव। 23 येसुए धन्याबाद चरैःद मिर्रालाई भरेस भाःद ओरायो पोक तिबेरियास सहरनी छुत दोङ्गल ब हुकेर। 24 नो मिर्राए

येसुलाई सोनो उसिसरालाई काङ्क ज़ यामारारैःवए नोर दोङ्गाल पसिद कफर्नहुमदा येसुलाई सापनाकेर।

25 नोराए दह होफत येसुलाई यारैःव प्राइंना, “गुर्बा, नँ खा बेलाक आड नहुव?” है यादोक ते, 26 येसुए, “डा जेलाई साचो है डादाचिज़्या, जे डालाई अचम्बलाव डायेनर रँःद जेसापनाज़्याव माःक, नो जेफू तसी भरेस ज़्याव जेदैवनी जेसापनाज़्याव ची। 27 निताव ज़्याद खेमन्या भरेसलाई ताखिमच्यो, बुरू अजम्बरी जुनील लाँज़्याव ज़्याव खिमचिके। निताव ज़्याव डा मिँ मिन्सिउए वाज़ यान्या डाले। होए उजूंनी ज़ परमेस्वर डाबाबुए डालाई खतैद नैनाव।” 28 हाःत ज़ नो मिँराए, “हिताव ताकिन गे परमेस्वरए उयुँलाव मिताव येन काता दान्या की?” है यादोक ते, 29 येसुए, “जे परमेस्वरए ओयेन दान्या आव ज़ — परमेस्वरए उपरीव ओज़ालाई जेयुँ सुहुपचिके,” है यादोक्यो। 30 नोराए, “नँ गेलाई गेयुँ सुहुपद्यान्या ताकिन, किताव नसरेस सतैद नयासिरिज़्याव, किताव येन नदोरिज़्याव? 31 भाःक गेसाखा पुर्खारए नाडग्या पात्या बनल मनन ज़्युकेर। धर्मसासत्रल मनी इताव सर्सिउ लिज़्या, ‘मोसाए मिँरालाई स्वर्गनी हुव ज़्याव याएक्यो,’ ”

है यादोक ते, 32 येसुए नोरालाई, “हैदी ब डा जेलाई साचो है डादाचिज़्या, जेलाई स्वर्गनी हुज़्याव साचो ज़्याव मोसाए ओयाचिज़्याव ते माःक, साचो ज़्याव याज़्याव ते परमेस्वर डाबाबुए ची। 33 डाबाबु परमेस्वरए ओराएज़्याव स्वर्गनी हुव ज़्याव नो ज़ मानुवाताव मिँरालाई बाँचैज़्याव,” है ओरादोक ते, 34 नोराए, “हो ची ताकिनदा प्रभु, गेलाई मनी नो ज़्याव याव ताके,” है यादोक ते, 35 येसुए नोरालाई, “मिँरालाई बाँचैज़्याव ज़्याव डा ज़। डाल्योक हुज़्याव करेन्या माले, डालाई उयुँ हुपज़्याव खर्क ज़ री

छोसून्या माले। ³⁶ खाली डा जेलाई है दाद डानैचिए, जे डालाई रँ:द ब जेयुं ज़ माहुबे। ³⁷ हैदी ब डाबाबु परमेस्वरए ओयाँज़्याव भरी डाल्योदा ज़ हुज़्यार। डाल्योक हुज़्याव भरी डा सुलाई ज़ डामारासोवोले। ³⁸ स्वर्गनी डा डापैँज़्याव मिताव सयोऩ्याए जूँनी डाहुव मा:क, डालाई परीँज़्याव परमेस्वरए उयुंलाव मिताव सयोऩा डाहुव ची। ³⁹ डालाई परीँज़्यावए ओपैँज़्याव आव ज़ — डालाई ओयाँज़्याव भरिरानी डा सुलाई ज़ मासमैद परमेस्वरए ओराफाल्रिज़्याव छचाम नोरालाई सिउनी सोचोइन्या डाले। ⁴⁰ है जैद परमेस्वर डाबाबुए उयुं आव ज़ — डा ओज़ालाई रँ:द यायुं हुपज़्यावरालाई संसार खेमन्या छचाम डा नोरालाई सिउनी सोचोइद अजम्बरी जुनील लाँन्या डाले।”

⁴¹येसुए ‘स्वर्गनी हुव ज़्याव डा ज़’ है ओरादोवए यहूदीर झन रूमरूमैद, ⁴² “आवए कै जैद ‘डा स्वर्गनी हुव’ है उलिज़्याव? आवए ओबाबु ओआमानिलाई गे ज़ गेरासरेसूज़्या। आव येसु ते योसेफए ओज़ा ज़ सानी,” है यालिक ते, ⁴³ येसुए, “जे काराव जेरूमरूमैज़्याव? ⁴⁴ डालाई परीँज़्याव डाबाबु परमेस्वरए डाल्योदा हुन्या युं जैद ओमाराएकिन सु ज़ डाल्योक माहुधुर। डाल्योदा हुज़्यावरालाई ते आव मानुवा ओखेमो छचाम सोचोइन्या डाले। ⁴⁵ अगमबक्तराए यासरोल मनी इताव सर्सिउ लिज़्या, ‘प्राँलाई ओल परमेस्वरए ज़ यापैरिज़्याव।’ जोए डाबाबु परमेस्वरए ओपाँ थैद सिऊसिज़्या, हो डाल्योक हुज़्या। ⁴⁶ परमेस्वर डाबाबुलाई सुए ज़ मारँ:तार। खाली ओलनी हुव डा ओज़ाए वाज़ रँ:द डानै। ⁴⁷ डा जेलाई साचो है डादाचिज़्या, जोए डालाई उयुं हुपज़्या, होस अजम्बरी जुनी लिज़्या। ⁴⁸ प्राँलाई बाँचैज़्याव ज़्याव डा ज़। ⁴⁹ जेसाखा पुख्वार ते बनल मनन याज़्युदी

ब सिद बाकेर। 50 स्वर्गनी हुव ज़्याव ज़्युज़्याव ते खर्क ज़ सिन्या माले। 51 नो स्वर्गनी हुव ज़्याव डा ज़। आव ज़्याव ज़्युज़्याव मिं खर्क ज़ सिन्या माले। आव मानुवाताव मिंरालाई बाँचैन्याए जूनी याव डापैज्याव ज़्याव आव डाक्याँ ज़।”

52 आव पाँत यहूदीर या याल खर्लेसिद, “आव मिँए कै जैद गेलाई ओक्याँ याद सन्नॉव ओपैज्याव ओताव?” है यालिज्याव थैद, 53 येसुए, “डा जेलाई साचो है डादाचिज्या, जे परमेस्वरनी हुव मिँ मिन्सिउए ओक्याँत जेकरे जेमासैःकिन, उझीत जेरीछो जेमासैःकिन अइज सिउ स्यासोर जेताज्या। 54 जोए फरी डाक्याँत ओकरे सैःज्याव, डाझीत उरीछो सैःज्याव, हो अजम्बरी जुनील गनिसिउ लिज्या। खेमन्या छ्याम नोलाई सोचोइन्या डाले। 55 काराव ल्यो ताकिन आव डाक्याँ साचो ज़्यान्या ज़्याव ज़, डाझी साचो ओन्या री ज़। 56 डाक्याँत ओकरे सैःज्याव, डाझीत उरीछो सैःज्याव, हो डास ज़ लिज्या, डा ओलस ज़ डालिज्या। 57 किताव डालाई परीज्याव डाबाबुए ल्योनी बाँचिउ ज़ डालिज्या, हिताव ज़ डाक्याँत ओकरे सैःज्याव मनी डानी ज़ बाँचिन्या ले। 58 है जैद डा ज़ स्वर्गनी हुव ज़्याव। नो ज़्याव जेसाखा पुर्खाराए याज्युव ज़्याव मिताव ते माःक। नोर नो ज़्याव ज़्याद माबाँचिर। आव है डालिज्याव ज़्याव ज़्युज़्याव ते खर्क ज़ सिन्या माले।” 59 आव पाँ भरी येसुए कफर्नहुमलाव धर्मसास्त्र झिमल ओरासथैज्याक ज़ है ओल्यो।

येसुए ओपाँत कुधुए यायुँ ओक्याव

60 आव पाँ थैद येसुए उछींत बाज्यावर कुधुए, “आव पाँ बनै नाल क़्याव लिज्या, सुए ची ओथैधुरिज्याव?” है लिद 61 यागनगनैज्याव येसुए सैद नोरालाई, “आव पाँए जेयुँ केःद ओयाचिज्याव रो? 62 हिताव ताकिन डा मिँ मिन्सिउ जुनी डाहुव होदा ज़ तछा

ओल्द डाबाज्याव जेरैःनाक झन हो छचाम कै जेलिरिज्याव?
 63 क्यौलाई बाँचैज्याव पाखाताव रैःज्यावए माःक, परमेस्वरए
 उपरूसए ची। जेलाई है डादाचिउ पाँल मनी उपरूस उलिज्यावए
 हो पाँए ज़ जेबाँचिज्या। 64 खाली आव पाँ है डादाचिदी ब जे
 ख्वार आव पाँत जेयुँ ज़ माहुबे,” है यादोक्यो। येसुए ओललाई
 यायुँ माहुपूज्यावर ड़ादाकिन ज़ सरेस्द ओरानैज्याव। ओललाई
 धोका याव पैज्यावलाई मनी ड़ादाकिन ज़ सरेस्द ओनैज्याव।
 65 फरी नोरालाई, “है जैद ज़ जेलाई है डादाचिउ, डाबाबु परमेस्वरए
 सुवारालाई डाल्योदा हुन्या युँ जैद ओमाराएकिन सु ज़ डाल्योदा
 हुधुन्या मालेर,” है ओरादोज्याव।

66निताव ओपाँए येसुस बाज्यावर कुधुए ज़ ओललाई रास्द ओल्द
 बाकेर। 67 हाःत ज़ येसुए बाह जना उसिसरालाई, “जे मनी बाव
 जेपैज्याव रो?” है ओरादोक ते, 68 सिमोन पत्रुसए, “प्रभु, गे नँलाई
 रास्द सुए ल्योदा बान्या? अजम्बरी जुनील बान्या पाँ ते नँस वाज़
 लिज्या। 69 परमेस्वरनी हुव छैव ओज़ा मनी नँ ज़ लिद सरेस्द गेयुँ
 हुपूद ज़ ले,” है ओदोक ते, 70 येसुए नोरालाई, “जे बाह जनालाई
 छाँतिज्याव डा ज़। हैदी ब जेखाल तोबो ते सैतानसकाव लिज्या,”
 है यादोक्यो। 71 येसुए आव पाँ सिमोन इस्करियोतए ओज़ा यहूदाए
 उजूनी है ओरादोव। नो मिँ बाह जना उसिसरानी ओललाई धोका
 याज्याव मिँ ज़ ओल्यो।

7

छापरा बासलाव पर्व

1आव भरी ओतावत येसु गालील जीदा आदा होदा लिनाके।
 यहूदियालाव यहूदीराए यासैरराए ओललाई सैःव यापैज्यावए
 नजीदा नोराए ल्योनी ओतर्किज्याव। 2 नो बेलाक यहूदीर सालकाव
 तखेप छापरा जैद यामानिज्याव पर्व हुनाद उलिज्याव। 3 है जैद

येसुए ओभाइराए, “नँ आव पोलाई रासूद यहूदियाल बान्के। हो ताकिन नसिसराए नड मनी नदोज्याव येनर रँ:न्या लेर। 4 उमिन सथासो पैज्याव मिँए मनी सुए ज़ ओयेन मोंद मादोव। नँ इताव येनर दोव नपैकिन मिँ भरिराए डाक सतैसिउ ताके,” है दोकेर। 5 काराव ल्यो ताकिन नो ओभाइराए मनी ओललाई यायुँ ओमाहुपूज्याव। 6 येसुए नोरालाई, “डा निताव येन दान्या बेला माहुताए, खाली जे जेजूनी ते बेला एकमून्या लिज्या। 7 जेलाई आव मानुवाताव मिँराए सुए ज़ मासोचिर। डा फरी आव मानुवाताव मिँराए माचाव यायेन सतैद डाराएज्यावए डालाई सोनाज्यार। 8 जे आव पर्व मानिना बाचिके, डा आख डामाबा, डाबेला माहुताए,” 9 है दाद ओल गालील ज़ लिके।

10 हैदी ब येसुए ओभाइर पर्व मानिना याबाव छीनी ओल मनी सुए यामासैद होदा ज़ बाके। 11 हो बेलाक पर्वत यहूदीराए यासेरराए, ‘येसु काङ्क उलिज्याव?’ लिद सापो ज़ यालिज्याव। 12 नो माहोल्याराए मनी येसुए उजूनी कुधु ज़ यापाँज्याव। ख्वाराए, “नो मिँ बनै चाव लिज्या,” है यालिज्याव, ख्वाराए फरी, “मा:क, नोए ते झन मिँर तँदा ज़ यालाँज्याव,” है यालिज्याव। 13 हैदी ब यहूदीराए यासेरराए छ्याचेए सुए ज़ पाखात मापाँधुकेर।

येसुए पर्वत परमेस्वरए ओपाँ ओरासथैव

14 नो पर्व नेला सोंला ओतावत येसु ध्यान झिमल बाद परमेस्वरए ओपाँ ओरासथैज्याव। 15 ओपाँ थैद यहूदीराए यासेरर अचम्ब ताद, “आव मिँ प्रिर ज़ माप्रिउए कै जैद ना: ओसैँज्याव?” है यालिज्याव 16 येसुए थैद, “आव डासथैचिज्याव पाँ डा डापाँ मा:क, डालाई परीँज्यावए ओपाँ ची। 17 परमेस्वरए उयुँलाव मिताव येन दोव पैज्यावए वाज़ आव पाँ परमेस्वरए ओपाँ सैँ डा डापाँ ओताव लिन्या प्णाल्धुज्याव। 18 ओलनी पाँज्यावए ते ओल उमिन सथासो पैज्याव। ओललाई परीँज्यावए उमिन सथासो पैज्याव ते ओखत

माल्यो सोजो मिं ज़ लिज्या। 19 जे परमेस्वरए ओकानुन मोसाए ल्योनी जेदैके, खाली जे नो कानुनलाव येन ते जेमादोके। झन डालाई सैःव जेपैज्या,” है ओरादोक ते, 20 नो माहोल्याराए, “नँ दासा बिसा ताद नले, नँलाई सुए सैःव ओपैज्याव?” है यादोक ते, 21 येसुए नोरालाई, “जे काराव नासिन्या छचाम तोबो येन डादोक हार जेमानिज्याव? 22 मोसाए जेलाई क्याल्न्या सरेस जैन्या कानुन याद नैचिउ। तान्या ते नो कानुन मोसाए ओयाचिउ ते माःक, जेसाखा पुर्खारए यायाचिउ ची। नो सरेस जैन्या नासिन्या छचाम उपरिकिन जे मनी ते हो छचाम क्याल्न्या सरेस जेराजैज्या। 23 निताव मोसाए ओकानुनलाई माबिरैन्याए जूनी नासिन्या छचाम क्याल्न्या सरेस जैन्या ओताज्याव ताकिन, नासिन्या छचाम डा तोबो मिंलाई डासगराँक जे काराव जेरिस ओचोज्याव? 24 जे मिं रँःद माःक, साचो युंनी फाल्नाच्यो।”

येसुलाई आव ज़ लिद यामाथरैधुव

25 हाःत ज़ यरूसलेमलाव रूवा रूवा मिंराए, “नो सैःव यापैज्याव मिं आव माःक रो? 26 झन निताव प्राइँए डाक मामोसिद ओपाँक ब सुए ज़ घाइ मादोर। सैं गेसेरराए मनी ‘गेलाई बाँचैना हुव ख्रीस आव ज़’ है लिद याथरैज्याव ओताव? 27 साचो ख्रीस ओताव ताकिन ते आनी उहुव लिन्या सुए ज़ मासैखेरहो। गे ते आवलाई आनी हुव ज़ लिन्या प्राइँए गेसैज्या,” है लिकेर।

28 हाःत ज़ येसुए ध्यान झिमल ओर्गा बनै सघ्योःद अइ लिद यासथैक्यो, “जे डालाई ब जेसरेस्नाज्या, आनी उहुव लिन्या ब जेसैज्या। हैदी ब डानी डाहुव माःक, डालाई परीव ओल साचो परमेस्वरए ज़। नोलाई ते जेमासरेसे। 29 डा ते डासरेस्ज्या। डा ओल्योनी ज़ डाहुके, डालाई परीज्याव ब ओल ज़,” है ओरादोव प्राइँना ज़, 30 नोराए क्योःव पैकेर। खाली ओबेला ओमाहुतावए

सुए ज़ हिउ माझाःधुकेर। ³¹ हितावत ब नलाव लिज़्यावर कुधुए ज़ येसुलाई यायुँ हुपूद, “नो हरिज़्या है यालिज़्याव ख्रीस उहुवत, आव मिंकिन घेप्पा येन ओदोधुरिज़्याव रो?” है लिकेर।

³²नो मोहोल्याराए येसुए उजूनी इताव खास खासनी खुस खुस यापाँज़्याव फरिसीराए थैद नोर मुख्या पुजारीरास खैद ओललाई क्योःना ध्यान झिमलाव पाल्यार यारापरींकेर। ³³ नो बेलाक ज़ येसुए, “डा जाँवा पै वाज़ जेस डालिरिज़्या, नकिन डालाई परींज़्यावए ल्योदा डाबारिज़्या। ³⁴ हाःकिन डालाई जेसापनादी ब दैधुन्या जेमाले, डालिज़्याव पोल जे हुधुन्या ब जेमाले,” है ओरादोक ते, ³⁵ यहूदीराए यासेरर या याल है लिकेर, “आव मिं काताड मोसिनाव ओपैज़्याव ब्याँ? ‘डालाई दैधुन्या जेमाले’ है लिज़्या। सैं आव देसलाई रासूद ग्रीकराए खाल्वा चितराँ पुतराँ ताव यहूदीराए खाल् लिनानद नोरालाई ओल्योदा ओराजैनारिज़्याव ओताव? ³⁶ नोए, ‘डालाई जेसापनादी ब दैधुन्या जेमाले, डालिज़्याव पोल ब हुधुन्या जेमाले,’ है उलिज़्यावए ओअर्थ काता ओताव?” है लिकेर।

जींदो री

³⁷पबर्ब स्योःन्या, प्राइरानी घेप्पा छचाम, येसुए प्राइराए ड़ाक च्याँःसिद ओर्गा बनै सथासूद, “छोस्ज़्याव मिं डाल्योक हुद उरीछो ओसैःहुवक। ³⁸ धर्मसासूत्रलाव सर्सिउ मिताव, जोए डालाई उयुँ हुपूज़्या, होए उयुँनी जींदो रीमुल मिताव पुलुसून्या ले,” है लिद यासथैक्यो।

³⁹नो जींदो री है उलिज़्याव ओललाई यायुँ हुपूज़्यावराए छैव पुरूस यादैरिज़्यावए जूनी ज़ ओपाँज़्याव। हाः बेलाक पै येसु स्वर्गदा ओमाबातावए छैव पुरूस परमेस्वरए ओमाराएताव।

⁴⁰हाःत ज़ नो माहोल्यारानी ख्वा ख्वाराए येसुए ओपाँ चावस थैद,

“साचो आव ज़ ओल्यो, हरिज़्या है यालिज़्याव अगमबक्ता,” है लिकेर। 41 ख्वाराए फरी, “नो ते परमेस्वरनी बाँचैना हरिज़्या है यालिज़्याव ख्रीस ज़,” है लिकेर। ख्वाराए फरी, “ख्रीस ताकिन गालीलनी ते हुव मापरिन्या। 42 ख्रीस दाऊदए ओथोल जर्मिद दाऊदए ओनाखार बेथलेहेमनी हुन्या ले लिद धर्मसास्त्रल सर्सिउ लिज़्या सानी।” 43 है जैद येसुए उज्जनी नो माहोल्थार यापाँ माखैद कुधु खर्लेसिकेर। 44 ख्वाराए ते ओललाई क्योःव यापैज्याव, खाली सुए ज़ हिउ माझाःकेर।

येसुलाई यामाक्योःधुव

45 छीनी नो फरिसीर स़ोनो मुख्या पुजारीराए येसुलाई क्योःना यारापरींव ध्यान झिमलाव पाल्यार अइज़ ओल्द याहुवए फरिसीराए, “येसुलाई काराव क्योःद जेमारैव?” है यारादोक ते, 46 नो पाल्याराए, “नोए ओपाँज्याव मिताव ते आःपै खर्क ज़ गेमाथैताए,” है यारादोक ते, 47 नो फरिसीराए, “जे मनी काता घरी नोए ओपाँ थैद तँदा जेबाधुव। 48 गे फरिसीर स़ोनो स्रेर ते नोए ओपाँत तोबो ब गेमाबाए सानी। 49 इताव मोसाए ओपाँ मासैज्याव याफ्याःहुव माहोल्थाराए वाज़ नोए ओपाँ थैज्यार,” है लिद यारासिडार्केर।

50 हाःत ज़ नक लिज़्याव फरिसीरानी येसुलाई ड़ादा तखेप दैना हुज़्याव नो निकोदेमसए, 51 “गे गोकानुनल जो मिँलाई तादी ब नोए ओपाँ माफाल्द ओयेनताव ओगल्ती माथरैद कै जैद नोलाई सजा यान्या ओताज्याव?” है ओरादोक ते, 52 नोराए, “काता नँ मनी नोसकाव गालीललाव ज़ रो? अगमबक्ता गालीलनी सु ज़ हुन्या माले, अछादी नँ ज़ धर्मसास्त्रल चावस चिऊके,” है दोकेर।

53[हाःत ज़ मिँ भरी सु सु याझिमदा बाकेर।

8

1 ओल येसु ते जैतून दाँदात बाके।

पातर्नी मेंमा

2हो परा:ती छकालून्या घग ज़ फरी ध्यान झिमल उहुवत मिँर बनै माहोल्या ओल्योक दुप्सिहुकेर। हा:त ज़ येसु चुसिद ओपाँ यासथैक्यो। 3 नो बेलाक ज़ सास्त्रीर सोनो फरिसीराए तोबो पातर्नी येनल क्यो:सिउ मेंमालाई रैद प्राइँराए डाक सच्याँद, 4 येसुलाई, “गुर्बा, आव मेंमाए पातर्नी येन ओदोज़याक ज़ क्यो:द नल्योक रैद गेनै। 5 मोसाए ओकानुननी ते निताव येन दाज्यावलाई लुँए झे:द सै:न्या लिज्या, नँ कै नलिज्या नी?” है दोकेर। 6 आव पाँ येसुलाई क्यो:न्याए जूनी अइज्ज अखतैँ थॉद यानैज्याव। खाली येसुए नोरालाई घाइ मादाद घोम लिद ओआडुलाए नामक सर्क्यो। 7 नोराए घरी पाला यासुधिक येसु च्याँ:सिद, “जेनी जोए काता पाप ज़ मादोव, होए ज़ आव मेंमालाई प्राइँरानी डात लुँए ओझे:वक,” है दाद, 8 फरी ब घोम लिद नामक सर्क्यो। 9 नो पाँ थैद नोर यासेरनी यासेरनी तोबो तोबोनी ओपो:स ज़ बाकेर। नो भरी याबावत नो मेंमा सोनो येसुनी वाज्ज रहिकिनी। 10 येसु फरी ब च्याँ:सिद नो मेंमालाई, “अ माँ, नँलाई रैज्यावर काना याबाव? सुए ज़ नपाहा झा:द यामाईधुव रो?” है ओदोक ते, 11 नो मेंमाए, “हैज्ज प्रभु, डापाहा झा:द्यान्या सु ज़ मापुलुस्केर,” है दोक्यो। हा:त ज़ येसुए, “डा ब नखत पले:द डामाईए, नझिमदा बान्के। आव माचाव नयेन फरी तादोयो,” है दाद परींक्यो।]

येसु आव मानुवाताव ज़गै

12 येसुए फरी मिँरालाई, “डा ज़ आव मानुवाताव ज़गै। डाछीँत हुज्याव मिँ चुम चुमोल बाव मापरिए, अजम्बरी जुनील लाँज्याव ज़गैवल ताज्या।” 13 हा:त ज़ नलाव फरिसीराए निताव पाँ थैद, “नँ

नजूनी नँ ज़ गोहाई नएजूयावए नगोहाई अनाकलाव ज़ लिजूया,” है यादोक ते, 14 येसुए, “डा डाजूनी डा ज़ गोहाई डाएदी ब नो पाँ अनाकलाव माले, काराव ल्यो ताकिन डा वाज़ कान्नी डाहुव, काना डाबारिजूयाव लिन्या डासैजूया। जे ते नो भरी जेमासैए। 15 जे ते मिँराए गोइँनी वाज़ छचाप जेलैनाजूया। डा ते सुलाई ज़ छचाप डामारालैए। 16 खाली डा निताव येन डादोदी ब नो साचो ज़ थंरिजूया, काराव ल्यो ताकिन नो येन डा वाज़ डामादोए, डालाई परीजूयाव डाबाबुए मनी डास ज़ दोजूयाव। 17 जे जेकानुनल मनी ‘नेब्लोए निपाँ ओखैकिन वाज़ नो पाँ साचो थंरिजूया’ लिद सर्सिउ लिजूया। 18 हिताव ज़ डा डाजूनी पाँजूयाव तोबो डा ज़, तोबो डालाई परीजूयाव डाबाबु ज़,” है ओरादोक ते, 19 फरिसीराए, “हुकी, नबाबु काड्डु उलिजूयाव की?” है यादोक ते, येसुए, “जे ना डालाई जेसरेसनाजूया, ना डाबाबुलाई जेसरेसजूया। जे डालाई जेसरेसनाव ताकिन डाबाबुलाई मनी सरेसून्या जेल्यो,” है यादोक्यो। 20 येसुए आव पाँ भरी ध्यान झिमलाव भिती याचरैःजूयाव पोक ज़ ओरासथैजूयाव। हितावत ब ओबेला ओमाहुतावए सुए ज़ माक्योःधुकेर।

येसुलाई मासरेसजूयावर यापापल सिन्या लेर

21 येसुए फरी नोरालाई, “डा जाँवाक आनी डाबारिजूया। हाः बेलाक डालाई जेसापनादी ब जेपापल ज़ सिन्या जेले। डा डाबाजूयाव पोड जे हुधुन्या जेमाले,” है ओरादोक ते, 22 यहूदीराए यासेरर या याल, “आवए काता ओपाँजूयाव इताव — ‘डा डाबाजूयाव पोड जे हुधुन्या जेमाले,’ है लिजूया? सैँ ओलनी ज़ सैःसिउ ओपैजूयाव ओताव?” है यालिजूयाव। 23 येसुए फरी, “जे मेलावर ज़, डा रोताव ज़। जे आव मानुवातावर, डा ते आव मानुवाताव माःक। 24 है जैद ज़ जेलाई है डादाचिउ, जे जेपापल ज़ सिन्या जेले। ‘डा हो ज़’ है दाद ब जेमापतिनाव प्राइँना नो जेपापनी कातानी उस्किकु जेदैरिजूयाव?” है

ओरादोक ते, ²⁵ नोराए फरी ब, “हुकी, नँ सुकी?” है यादोक ते, येसुए, “डाजूनी जेलाई डादाकिन ज़ है दाव ज़ डानैचिज़्या सानी। ²⁶ डानी ताकिन ते जेलाई है दान्या ब कुधु ज़ लिज़्या, जेखत पले-घान्या ब कुधु ज़ लिज़्या। खाली डालाई परीज़्यावए ल्योनी डाथैव भरी वाज़ आव मानुवाताव मिँरालाई डारासथैज़्या। होए ओपाँ थंरिउ ज़ लिज़्या,” है यादोक्यो। ²⁷ खाली येसुए नो भरी ओबाबु परमेस्वरए उजूनी ओपाँव नोराए अझ मनी माबुझिकेर।

²⁸ येसुए फरी ब है यादोक्यो, “जे डा मिँ मिन्सिउलाई क्रुसत जेतङ्गैनारिज़्याव छयाम वाज़ ‘डा हो ज़’ लिन्या सरेसन्या जेले। डादोज़्याव भरी डानी काता ज़ डामादोए, डाबाबुए ओपैनाव वाज़ डापाँज़्या लिन्या ब सैन्या जेले। ²⁹ डालाई परीज़्याव डस ज़ लिज़्या। डादोज़्याव येन भरी ब उयुँलाव मिताव ओतावए डालाई डाबातड मानैनाव।” ³⁰ नो पाँत नक लिज़्यावर कुधुए ज़ येसुलाई यारुँ हुपके।

अब्राहामए ओथोर सोनो सैतानए ओथोर

³¹ येसुए ओललाई यारुँ हुपज़्याव यहूदीरालाई है यादोक्यो, “आव डापाँत धिद जेलिकिन जे साचो डसिसर ज़ जेताज़्या। ³² साचो पाँर सैद, नो पाँए जे पलाःसिउर जेतारिज़्या,” है ओरादोक ते, ³³ नोराए, “गे ते अब्राहामए ओथोर ची, सुए उधुँल ज़ गेमालिताए। नँ कै जैद गेलाई ‘पलाःसिउर जेतारिज़्या’ है नदासिज़्याव?” है यादोक ते, ³⁴ येसुए, “जेलाई साचो है डादाचिज़्या, पाप दाज़्याव मिँ पापए धुँल बाँदा मिताव लिज़्या। ³⁵ बाँदा एकमन्या झिमलाव माताए, झिमए ओर्गेए ओज़ा ते एकमन्या झिमलाव ज़ ताज़्या। ³⁶ है जैद डा परमेस्वरए ओज़ाए जेलाई पलाःद डारासचिकिन, जे ननी चबनै पलाःसिउर ज़ जेताज़्या। ³⁷ जे अब्राहामए ओथोर लिन्या डा ज़ डसैज़्या। हितावत मनी डा डापाँए जेयुँल लिन्या पो ओमादैवए डालाई सैःव जेपैज़्या। ³⁸ डा डापाँज़्याव भरी डाबाबुए ल्योडाव

डारें:व वाज़ डापाँज़्या। हिताव ज़ जे मनी जेबाबुए ल्योनी जेथैव वाज़ जेदोज़्या,” है यादोक्यो।

39नोराए झन, “गे गेबाबु ते अब्राहाम ज़,” है लिकेर। येसुए, “जे साचो अब्राहामए ओज़ार जेताकिन जे मनी होए ओदोव मिताव येन दान्या जेल्यो। 40 जे ते झन परमेस्वरनिकाव डाथैव सतलाव पाँर जेलाई डासथैचिक डालाई सै:व जेपैज़्या। अब्राहामए ते निताव येन मादोव। 41 जे ते छुत जेबाबुए ओयेन जेदोज़्या,” है ओरादोक ते, नोराए, “गे नामर्यार मा:क, गे गेबाबु तोबो ज़ लिज़्या, ओल परमेस्वर ज़,” है दोकेर।

42हा:त ज़ येसुए, “साचो जे जेबाबु परमेस्वर ज़ ताकिन जे डालाई मया दान्या जेल्यो। डा ओल परमेस्वरनी हुव ज़। आव मानुवात डानी डाहुव मा:क, ओल उपरीनाव ज़। 43 आव डापाँ कै जैद जेमातीधुज़्याव? थैन्या युँ जेमादोज़्याक ज़ जेमातीधुइ। 44 जे जेबाबु सैतानए ओज़ार जेतावए होए उयुँलाव मिताव येन दोव जेपैज़्या। नोए ओयेन मनी भा:किन ज़ सै:न्या उलिज़्याव। नोस साचो काता ज़ ओमाल्योए साचो पाँलाई मासहिधुव। नोए ओबानी धुत पाँन्या ओतावए धुत ज़ पाँज़्या। है जैद नो धुत पाँज़्यावराए याबाबु ज़। 45 खाली डा साचो डापाँज़्यावए डालाई जेयुँ माहुबे। 46 जेनी डालाई पापी थरैन्या सु उलिज़्याव? डा साचो डापाँकिन कै जैद डापाँत जेयुँ ओमाहुपज़्याव? 47 परमेस्वरए उमीराए ते परमेस्वरए ओपाँ ज़ थैज़्यार। जे ते परमेस्वरए उमीर जेमातावए ओपाँ ब जेमाथैधुइ।”

अब्राहामकिन येसु घ्यो:व

48हा:त ज़ यहूदीराए येसुलाई, “नँलाई प्राइँए ज़ सामरी है यादीज़्याव ते साचो ज़ ओल्यो! नँलाई माचाव पुरूसए क्यो:द ओनैनिज़्याव मिताव ब गेरें:निज़्या,” है यादोक ते, 49 येसुए, “जे कै जैद डाक्याँत माचाव पुरूस जेरें:ज़्याव? डा छैँव परमेस्वरए ओमान

नैद डाएज़्या। जे ते डालाई डापाहा झाःद जेयाँज्या। ⁵⁰ हैदी ब डा ते डामान डामाखिमे। डा डाय़ेनर छ्यानिद डालाई मान याज़्याव छुत तोबो लिज़्या — नो परमेस्वर ज़। ⁵¹ जेलाई साचो है डादाचिज़्या, डा डापाँ भैःद दोज़्याव मिँ खर्क ज़ सिन्या माले,” है ओरादोक ते, ⁵² नो यहूदीराए झन, “अब ते नक्याँत माचाव पुरूस चरिद उलिज़्याव साचो ज़ गेथरैके। अब्राहाम गेपुर्खा ब सिके, अगमबक्ता भरी ब सिकेर। नँ कै जैद ‘डापाँ भैःद दोज़्याव मिँ खर्क ज़ सिन्या माले’ है नलिज़्याव? ⁵³ काता, नँ सिद बाव गेपुर्खा अब्राहाम सोनो अगमबक्ताकिन ब घ्योःव नलिज़्याव रो? नँ काता नसमजिज़्याव?” है यादोक ते, ⁵⁴ येसुए, “डा डानी ज़ सघ्योःसिउ डापैकिन डामिन अनाकलाव ज़ ताज़्या। खाली डालाई सघ्योःज्याव डाबाबु परमेस्वरए ज़। नोलाई जे मनी ‘गेपरमेस्वर ज़’ है जेदोज़्या। ⁵⁵ खाली जे परमेस्वरलाई ते खर्क ज़ जेमासरेसे, डा ते डसरेसूज़्या। डा होलाई डामासरेसे है डालिकिन, डा मनी जे मिताव धुत पाँज्याव ज़ थोरिन्या डाले। डा होलाई ब डसरेसूज़्या, ओपाँ ब भैःद डादोज़्या। ⁵⁶ जेपुर्खा अब्राहाम मनी आव डाबेलार सैद उयुँर होलाँ ताके, रँःद खुसी ब ताके।”

⁵⁷ हाःत ज़ यहूदीराए, “नँ पचास बर्स मायोःताव मिँए कै जैद ‘अब्राहामलाई डारँःके’ है नलिज़्याव?” है यादोक ते, ⁵⁸ येसुए, “जेलाई साचो है डादाचिज़्या, डा अब्राहाम ओमाजर्मिद डादाकिन ज़ डालिज़्या,” है ओरादोव प्राईना, ⁵⁹ नोराए झन लुँर तीद येसुलाई झेःव पैकेर। हाःत ज़ येसु ध्यान झिमनी अलगज़ा पुलुसद बाके।

9

येसुए उमी मारैःवलाई ओसगराँव

¹ येसु येमत ओबाज़्याक तोबो जर्मननी ज़ उमी मारैःवलाई रँःक्यो।

² नाःत ज़ उसिसराए, “गुर्बा, आव उमी मारैःव सुए ओदोव पापए

अइ ओताव? ओल ओदोवए सैं ओबाबु ओआमाराए यादोवए अइ ओताव?” है यादोक ते, ³ येसुए, “आव ओल ओदोव पापनी ब माःक, ओबाबु ओआमाराए यादोव पापनी ब माःक। परमेस्वरए ओसक्ती ओक्याँत सरैःन्याए जूनी अइ ओताव ची। ⁴ आव पलाँव बेला उलिज्याक ज़ डालाई परीज्यावए ओयेन गे दाव ताके। चुम चुमो ओतावकिन ते सुए ज़ येन मादोधुव। ⁵ आव मानुवात डालेवा भरी, मानुवाताव ज़गै डा ज़,” है दाद, ⁶ येसुए नामक तिल्द, गम मुछिद, नो उमी मारैःवए उमीत थीद्याद, ⁷ “आव नमीताव हिला सिलोआम दहल च्यानाके,” है दाद परीक्यो। (सिलोआमए ओअर्थ परीसिउ।) नो दहल बाद उमीताव हिला ओच्याव प्राइँना उमी रैःके। ⁸ निताव रँःद ओनाखार जीलावर सोनो डादाकिन निद ओडासिज्याव रँःज्यावराए, “आव ते नो डादाकिनकाव निज्याव मिँ ची सानी!” है लिकेर। ⁹ ख्वाराए फरी, “हैज़, आव हो ज़,” है लिकेर। ख्वाराए फरी, “आव हो माःक, नो उमी मारैःवस जेसोबोरोल्ज्याव ताखेहो,” है लिकेर। नो उमी मारैःज्यावए फरी नो यापाँ थैद, “डा हो ज़ ब्याँ,” है ओरादोक ते, ¹⁰ नोराए, “हुकी, नँ नमी कै जैद ओरैःव की?” है यादोक ते, ¹¹ नोए, “येसु है यादोज्यावए हिला जैद डामीत थीद्याद सिलोआम दहल च्यानाव परीनाक्यो। नल बाद डाच्याव प्राइँना रँःधुन्या डाताके,” है यादोक्यो। ¹² नोराए, “आव है नलिज्याव मिँ काना ओबाव?” है यादोक ते, “माँ, डा ते डामासैए,” है यादोक्यो।

फरिसीर उमी गरॉवस यापाँव

¹³ हाःत ज़ नोराए उमी गरॉवलाई फरिसीराए ल्योक लाँकेर। ¹⁴ येसुए नोलाई उमीत हिला थीद्याद रँःधुन्या ओजैव नासिन्या छ्याम ओल्यो। ¹⁵ नो फरिसीराए मनी, “नँ कै जैद रँःधुन्या नताव?” है यादोक ते, नोरालाई मनी नो रँःधुन्या तावए, “होए डामीत हिला थीद ओयाँव, डाच्याव प्राइँना रँःधुन्या डाताके,” है यादोक्यो।

16 नलाव फरिसीर रूवा रूवाराए नो ओपाँ थैद, “आव सगराँज्याव मिँ परमेस्वरनी हुव ते माःक, मानी नासिन्या छचामकाव येन मादान्या कानुनलाई माख्याखेहो,” है लिकेर। रूवाराए फरी, “नो मिँ पापी ताकिन इताव अचम्बलाव येन कै जैद ओदोधुरिज्याव?” है लिद या याल माखैकेर।

17 नोराए उमी गराँवलाई, “नँ नमी सगराँद्याज्यावलाई किताव नडमसिज्या?” है यादोक ते, नोए, “नो अगमबक्ता ज़,” है यादोक्यो। 18 नो यहूदीराए यासेरराए, “आव मिँ ते डादा उमी मारैःव ओल्यो माताखेहो,” लिद नोए ओपाँ मापतिकेर। है जैद ओबाबु ओआमानिलाई याल्योक खुल्द, 19 “आव जर्मननी ज़ उमी मारैःव है यादोज्याव जिनज़ा रो? निताव ओल्यो ताकिन कै जैद रँःधुन्या ओताव?” है यारादोक ते, 20 ओबाबु ओआमानी, “हैज, आव गिनज़ा ज़, जर्मननी ज़ उमी मारैःव ओल्यो। 21 खाली कै जैद रँःधुन्या ओताव, सुए ओजैव गिन गिनमासैए। ओललाई ज़ है दोचिके, नो लुज़ा माले, ओल ज़ पाँधुन्या ले,” है यारादोकिनी। 22 नोनी यहूदीराए यासेरराए छचाचेए नितावनी निपाँव। नो सेरराए डादा ज़, “जोए ‘येसु परमेस्वरनी बाँचैना हुव ख्रीस ज़’ है लिज्या, होलाई धर्मसास्त्र ज़िमनी पलेःन्या,”* है यालिज्याव। 23 है जैद ज़ नो ओबाबु ओआमानी, “नो लुज़ा माले, ओललाई ज़ है दोचिके,” है निरादोव।

उमी गराँवए यहूदीराए यासेररालाई जवाप ओरायो

24 नकिन नो यहूदीराए यासेरराए फरी ब नो उमी गराँवलाई याल्योक खुल्द, “नो मिँ ते पापी ची लिन्या गे गेसैँज्या। कै जैद नँ ‘परमेस्वरए ओसगराँनाव’ है नमालिधुज्याव?” है यादोक ते, 25 नोए, “डा नो मिँ पापी उलिज्याव सँ ओमालिज्याव लिन्या डामासैए। तोबो वाज़ डामासैँज्या, डादा मारैःधुन्या डाल्यो, अब रँःधुन्या डाताके,”

* 9:22 9:22 छुत बुझिन्या – समाजनी पलेःद बातड जैन्या।

है ओरादोक ते, ²⁶ फरी ब नोराए, “नोए नँलाई कै कै जैद रँ:धुन्या ओजैनिउ?” है यादोक ते, ²⁷ नोए फरी, “है दाव ज़ डानैचिज़्या सानी, जेमाथैधुइ रो? तोबो पाँलाई खा ची है दान्या, सैं जे मनी उसिसर जैसिउ जेपैज़्याव?” है ओरादोक ते, ²⁸ नोराए थल्द, “नँ ची होए उसिस ते, गे ते मोसाए उसिसर ची। ²⁹ मोसास परमेस्वर ओपाँव ते गेसैज़्या, आव मिँ सुए ल्योनी हुव गे गेमासैए,” है दोकेर। ³⁰ हा:त ज़ नो उमी गराँवए, “आव ते बनै अनवार्यासो पाँ ज़ जेपाँके। डालाई रँ:धुन्या ओजैनाज़्यावत ब कै जैद आनी हुव लिन्या जेमासैज़्याव? ³¹ परमेस्वरए पापीराए यापाँ माथैव, ओमान नैद्याज़्याव उयुँलाव मिताव येन दाज़्यावराए यापाँ वाज़ थैज़्याव लिन्या प्राइँए गेसैज़्या सानी। ³² आव संसार ओतावकिन जर्मननी ज़ मारँ:धुज़्यावलाई रँ:धुन्या जैक्यो लिन्या आ:पै सुए ज़ गेमाथैताए। ³³ नो मिँ परमेस्वरनी हुव ओमाताव ताकिन, कै जैद निताव येन ओदोधुरिज़्याव?” है ओरादोक ते, ³⁴ नोराए झन नोलाई, “नँ पापल जर्मिद नपाप भुगिउ पैक्याए गेलाई पैव नपैज़्याव रो?” है लिद नोलाई धर्मसास्त्र झिमनी हुतैद पले:केर।

साचो मारँ:धुन्यार

³⁵येसुए नोलाई पले:केर दी लिन्या थैद नोस दैसिनाद, “मिँ मिन्सिउलाई नयुँ माहुपूज़्या?” है ओदोक ते, ³⁶ “नो मिँ मिन्सिउ है नलिज़्याव सु ओताव, प्रभु? डा नोलाई डारँ:किन डायुँ हुपन्या ले,” है ओदोक ते, ³⁷ येसुए, “नो मिँलाई रँ:द ब ननै, डा नँस पाँज़्याव ब हो ज़,” है ओदोव प्राइँना, ³⁸ नो मिँ ओड़ाक फुलुप्सिद, “प्रभु, डा नँलाई डायुँ हुपके,” है दोक्यो।

³⁹हा:त ज़ येसुए, “काता ज़ मासैन्यार मारँ:धुन्यार सैन्या रँ:धुन्या ओतारक, फरी ‘गेसैज़्या गेरँ:ज़्या’ है लिज़्यावर काता ज़ मासैन्या छाम छामोर ओतारक लिद आव मानुवाताव मिँरालाई

डाराछयानिहुव,” है लिके। 40 नक लिज्याव फरिसीराए थैद, “हुकी, गेलाई मनी गेमी मारैःव मितावर नजैसिज्याव रो?” है यादोक ते, 41 येसुए, “जे साचो काता ज़ मासैंधुन्या मारैःधुन्यार जेताव ताकिन जेखत माल्योर तान्या जेल्यो। खाली जे ‘सैंद रैंद ज़ गेदोज्या’ है जेलिज्यावए जेखत ल्योर जेताके,” है यादोक्यो।

10

येसु बेधाराए चाव यार्गे गावला

1नकिन येसुए फरी, “डा जेलाई साचो है डादाचिज्या, बेधा खोरल ग्रामनी मापसिद तैनी पसिज्याव ते चोर दाँका ज़ ताज्या। 2 ग्रामनी पसिज्याव ते साचो बेधाराए यागावला ज़। 3 ग्राम गुज्यावए नोलाई ग्राम फैदिज्याव। नो गावलाए फरी ओबेधारालाई यामिन हाइए हाइए ओराक्रिक नोर ओर्गा थैद ओल्योदा याहुवत खोरनी याहाइज्याव। 4 प्राइँ पाखात यापुलुसोत फरी ओल याडा याडा बाज्या। बेधार फरी ओर्गा सरेस्द उछीं उछीं हुज्यार। 5 नो बेधार यामासरेसो मिँए उछींत ते माबार। ओर्गा यामासरेसोए झन छेद धोंःज्यार,” है लिद यासथैक्यो।

6येसुए आव बेधा गावलाए घर्ती झाःद ओरासथैव पाँ नो थैज्यावराए ओअर्थ मातीधुकेर। 7 है जैद येसुए फरी है यादोक्यो, “डा जेलाई साचो है डादाचिज्या, नो बेधाराए याखोरलाव ग्राम डा ज़। 8 डाकिन डादा हुव भरी जाँकोसै चोरर दाँकार वाज़ याल्यो। है जैद बेधाराए नोराए यार्गा माथैकेर। 9 साचो ग्राम ते डा ज़। डाल्योनी पसिज्यावर प्राइँ बाँचिन्या लेर। आदा होदा लिद चाव चरनल लाव ब दैन्या लेर। 10 चोरए ओय्रेन ते कुन्या, सैःन्या, खेमन्या वाज़ लिज्या। डा ते डाबगालराए बनै धोल पोगोल जुनी ओदैरक लिद डाहुव ची।

11“डा ज़ बेधाराए चाव यार्गे गावला। चाव गावलाए ओबेधाराए जूनी उजिउ झाःद्यान्या ब तयार ज़ ताज्या। 12 बाहोर्या गावला ते,

बेधार ओल उमीर यामातावए प्रर याहुज्याव रँद बेधार रासूद धोःद बाजूया। है जैद प्रर हुद बेधारालाई छुपिद चितराँ पुतराँ याराजैजूयार। ¹³ नो बाहोर्या वाज़ ओतावए बेधाराए ल्योदा उयुँ ज़ माले। ¹⁴ डा फरी चाव यार्गे गावला ज़। किताव डा डाबेधारालाई डारासरेसूजूया, सोनो या डालाई सरेसूनाज़यार, ¹⁵ हिताव ज़ डाबाबुए डालाई सरेसूनाजूयाव, सोनो डा मनी ओललाई डारासरेसूजूया। है जैद नो डाबेधाराए जूनी तछा डाजिउ ब डाझाःरिजूया। ¹⁶ आव खोरल माल्यो छुत डाबेधार ब लिजूयार। नोरालाई मनी तछा डारारैरिजूया। नोराए मनी डार्गा याथैवत, बगाल ब तोबो वाज़ तान्या ले, गावला मनी तोबो वाज़ तान्या ले। ¹⁷ डाबाबुए डालाई मया दाँजूयाव, काराव ल्यो ताकिन डा डाबेधाराए जूनी डाजिउ झाःद, नो डापोहोन फरी रैन्या डाले। ¹⁸ नो डापोहोन डानी सुए ज़ मालाँधुर, डा डायुँ स्यानी ज़ डाझाःरिजूया। झाःन्या, सोवोल्न्या डा डकुइत ज़ लिजूया। निताव येन दान्या परमेस्वर डाबाबुए ज़ डालाई याद नैनाव।”

¹⁹ आव पाँत यहूदीर या याल माखैनाकेर। ²⁰ रूवाराए, “आवलाई माचाव पुरूसए क्योःद बोःलैद नैव। काराव नितावए ओपाँ जेथैजूयाव?” है लिकेर। ²¹ रूवाराए फरी, “इताव पाँ कै जैद बूलिउ मिँए ओपाँ ओताजूयाव? माचाव पुरूसए सुलाई ज़ रँःधुन्या माराजैव,” है लिकेर।

येसुलाई सरेसूजूयावर

²² हाः बेलाक यरूसलेमलाव ध्यान झिमलाई चोखोइन्या पर्व हुद उलिजूयाव। नो पर्व सालकाव तखेप युँदाक ओताजूयाव। ²³ नो बेलाक येसु ध्यान झिम जीलाव सोलोमन मैराल उलिजूयाक, ²⁴ यहूदीर ओल्योक गुरिगाँ हुद, “नँ साचो ख्रीस ताकिन गेलाई छर्लङ्ग ज़ है दासिके। खा पै गेलाई आदा तान्यानी होदा तान्याल ननैसिरिजूयाव?” है यादोक ते, ²⁵ येसुए, “जेलाई डादाकिन ज़ है

दाव ज़ डानैचिज़्या, हितावत ब जेयुँ ज़ माहुबे। डाबाबुए उमिननी डादोज़्याव येनराए ज़ 'डा हो ज़' लिद सतैज़्यार। ²⁶ खाली जे डाबगाललावर जेमातावए ज़ डालाई जेयुँ माहुबे। ²⁷ डाबगाललाव बेधाराए ते डार्गा थैज़्यार। डा नोरालाई डारासरेसज़्या, नोर मनी डाछींत हुज़्यार। ²⁸ डा नोरालाई अजम्बरी जुनी डाराएज़्या। है जैद नोर खर्क ज़ कै मै तान्या मालेर। डाल्योनी सुए मनी नैद लाँधुन्या मालेर। ²⁹ नोरालाई डाकुइत याज़्याव परमेस्वर डाबाबु बनै ओसक्ती ल्यो प्राइरानी घेप्पा लिज़्या। है जैद नोए ओल्योनी ब सुए ज़ नैद लाँधुन्या मालेर। ³⁰ डाबाबुस गिन तोबो ज़ गिन्लिज़्या।”

यहूदीराए येसुलाई झे:व यापैव

³¹ यहूदीराए आव पाँ थैद यारिसए लुँर तीद येसुलाई झे:व यापैज़्याक, ³² येसुए, “डाबाबुए ल्योनी चाव येनर जेड़ाक कुधु ज़ सतैद डायचिके, नो भरिनी काताकाव येनए उजूनी लुँए झे:व जेपैज़्याव?” है ओरादोक ते, ³³ यहूदीराए, “नँलाई चाव येनए जूनी झे:व गेपैज़्याव मा:क, परमेस्वरए उमिन नबलेज़्यावए जूनी ची। नँ मिँ ताद कै जैद परमेस्वरस सम सम नजैसिज़्याव?” है यादोक ते, ³⁴ येसुए, “जेधर्मसास्त्रल परमेस्वरए है लिज़्या — ‘जे मिँ ईस्वर मितावर ज़।’ ³⁵ धर्मसास्त्रलाव सर्सिउ पाँ अनाकलाव माले लिन्या जे मनी जेसैज़्या। है जैद परमेस्वरए ओल ओपाँ दैवरालाई ईस्वर मितावर ज़ है ओरादोकिन, ³⁶ डाबाबुए डालाई खतैद आव मानुवात उपरींनावए, ‘डा परमेस्वरए ओज़ा ज़’ है डादाचिक, जे कै जैद ‘परमेस्वरए उमिन नबलेज़्या’ है जेदाँज़्याव? ³⁷ डा डाबाबुए ओयेन डामादोज़्याव ताकिन जे डालाई जेमापतिनादी ब ताए। ³⁸ फरी नो येन डादोज़्याव ताकिन डालाई जेमापतिनादी ब, डादोज़्याव येनत ते जेयुँ हुबो ज़ परिके। हो ताकिन ची परमेस्वर डाबाबु डास लिद

तोबो ज़ गिन्लिज़्याव सैद थरैन्या जेले,” है यादोक्तो। 39 नोर झन नो पाँ थैद फरी ब येसुलाई क्योःव पैकेर। येसुए फरी नोराए ल्योनी छाँसिद याखार्नी ज़ पुलुस्द बाके।

40नकिन येसु ननी पुलुस्द यर्दन भै होफताव यूहन्नाए डादा रीनी ओरासछैज़्याव पोड ज़ लिनाके। 41 नक मिँर येसुए ल्योक बनै माहोल्या हुद, “यूहन्नाए ते अचम्बलाव येनर काता ज़ मादोव। हैदी ब आव मिँए उजूनी ओपाँव पाँ भरी साचो ज़ ओल्यो,” है लिद, 42 नलावर कुधु ज़ येसुलाई यायुँ हुप्के।

11

लाजरस उसिउ

1नाः बेलाक बेथानिया नाखारल तोबो लाजरस यादोज़्याव मिँ ओजोरो हुद थलिद उलिज़्याव। नो मिँ मरियम स़ोनो मार्थानी निभाइ ज़। 2 नो मरियम ज़ छीनी येसुलाई उखँत मास थीद्याद ओचेमए सीद्याज़्याव। नो ओजोरो हुव लाजरस नोए ओभाइ ज़। 3 नोए ओनानानी येसुलाई, “प्रभु, नयुँलाव लाजरस ओजोरो हुद थलिद ले,” है लिद तोबो सोर परीकिनी। 4 येसुए नो सोर थैद, “आव जोरोए लाजरसलाई सिउका सिउ जैन्या माले, परमेस्वर डाबाबुए उमिन झन ज़ सघ्योःन्याए जूनी ची। डा ओज़ाए डामिन मनी झन ज़ घ्योःन्या ले,” है लिके।

5येसुए मार्था, मरियम स़ोनो लाजरसरालाई बनै मया ओरादोज़्याव। 6 निताव ओजोरो उहुज़्याव सोर थैद ब हतपूत ज़ माबाद नो उलिज़्याव पोक ज़ अझ नेला लिके। 7 नकिन येसुए उसिसरालाई, “गे फरी यहूदियादा गेबा,” है ओरादोक ते, 8 उसिसराए, “गुर्बा, ताला नलाव यहूदीराए नँलाई लुँए झेःव यापैज़्यावत ब काराव फरी नदा ज़ बाव नपैज़्याव?” है यादोक ते, 9 येसुए, “तछात बाह घन्ता पलाँ ताज़्या। लाक बाज़्याव मिँ आव मानुवाताव ज़गै ओलस ओतावए कान्त ज़ मातुमे। 10 रील बाज़्याव ते, ओलस

जगै ओमातावए तुम्द पाजूया,” है यादोक्त्यो। 11 नकिन फरी, “गेनै लाजरस घेप्पा डलत बाद ले, डा नोलाई डसोचोइनारिजूया,” है ओरादोक ते, 12 उसिसराए, “प्रभु, अइज्ज घेप्पा डलत उलिजूयाव ताकिन ते, जुनी ब गराँया ज़,” है लिकेर। 13 खास येसुए ते लाजरस उसिधुवए उज्जूनी ज़ ओपाँजूयाव, उसिसराए माबुझिद साचो डलद उलिजूयाव ज़ याजैजूयाव। 14 है जैद येसुए छर्लङ्ग ज़ है यादोक्त्यो, “लाजरस सिधुके। 15 खाली जे जेयुँ झन ज़ सुहुप्यान्याए जूँनी हतपूत डामाबाव चाव ज़ ताके। अब ते हुचिके, लाजरसए ल्योदा गेबा,” है ओरादोक ते, 16 दिदुमस यादोजूयाव थोमाए ओलसकाव येसुए उसिसरालाई, “दे च्याँ:सिचिके, गेबा। गेलाई मनी ओलस ज़ यासै:सिकिन्दा सै:सिकेर ब!” है यादोक्त्यो।

येसु लाजरसए ओनाखारल ओबाव

17 येसु उसिसरास लाजरसए ओनाखारल याकेसूनाक, लाजरसलाई खादरल याझा:व चार दिन ताके है लिन्या थैकेर। 18 लाजरस ओनाखार बेथानिया यरूसलेमकिन स्रोकिलोमितरवा उलिजूयाव। 19 निभाइ उसिउए मार्था सोनो मरियमनिलाई यहूदीराए कुधुए याराचिरुहुजूयाव। 20 मार्थाए, ‘येसु हुजूया दी’ लिन्या थैद मरियमलाई झिमक ज़ ख्यानैद येमड ज़ दैसिनाद, 21 येसुलाई, “प्रभु, नँ नल्यो ताकिन ते डाभाइ सिन्या ओमाल्यो। 22 हैदी ब आख मनी नँ परमेस्वरस जो ननिजूया हो ज़ यान्या ले लिन्या डसैजूया,” है ओदोक ते, 23 येसुए, “नभाइ फरी ब सोन्या ले,” है ओदोक ते, 24 मार्थाए, “हैज्ज प्रभु, परमेस्वरए मिँरालाई अजम्बरी जुनील ओरासोचोइव छचाम नो मनी सैसिद सोन्या ले,” है दोक्त्यो। 25 हा:त ज़ येसुए, “सिउरालाई सोचोइजूयाव ब डा ज़, अजम्बरी जुनी याजूयाव ब डा ज़। है जैद जोए डालाई उयुँ हुपूजूया, हो उसिदी ब फरी सैसिन्या ले। 26 डालाई यायुँ हुपूद बाँचिन्यार ते

खर्क ज़ सिन्या मालेर। आव डापाँत नयुँ माहुपूज़्या?" है ओदोक ते, 27 मार्थाए, "हैज़ प्रभु, नँ आव मानुवात हुरिज़्या है यालिज़्याव परमेस्वरए ओज़ा ख्रीस ज़ लिद डायुँ हुबो ज़ लिज़्या," है दाद, 28 उज़िमदा बाद ओबैनी मरियमलाई अलगज़ा खुल्द, "गुर्बा आल हुद ले, नँलाई सापनिज़्याव," है ओदोव प्राइँना, 29 मरियम हतपत ज़ च्याँःसिद दैसिनाके।

येसुए सिउ लाजरसलाई ओजागैव

30 हाःपै येसु नाखारल ओमाहुताव, मार्थाए ओख्यानैव पोक ज़ उलिज़्याव। 31 नो ज़िमक लिज़्याव चिऊना हुव यहूदीर मरियम थर च्याँःसिद ओबाज़्याव रँःद, "फरी खादरक ओघर्नाज़्याव ताक्या" लिद उछीं उछीं बाकेर। 32 मरियम येसुए ल्योक केसूद उखँत फुलुप्सिद, "प्रभु, नँ नल्यो ताकिन डाभाइ सिन्या ओमाल्यो," है दाद, 33 घर्के। उछीं उछीं हुव यहूदीर मनी ओलस ज़ याघर्ज़्याव। येसुए निताव रँःद उयुँ बनै माचाव दाद, 34 "नोलाई काङ्क झाःद जेनैज़्याव?" है ओरादोक ते, "हुद चिऊके, प्रभु," है दोकेर। 35 हाःत ज़ येसु मनी घर्के। 36 नो रँःद नलाव यहूदीराए, "लाजरस बनै उयुँलाव मिताव मिँ ओल्यो," है लिकेर। 37 ख्वाराए फरी, "आव मिँ मारँःधुन्यालाई रँःधुन्या जैज़्यावए लाजरसलाई ओमाबाँचैधुव रो?" है लिकेर।

38 हाःत ज़ येसु उयुँर धो थाइव ताद खादरक बाके। नो खादर तोबो पुप ओल्यो, ओयाःत बनै घ्योःव लुँ कसिउ उलिज़्याव। 39 येसुए, "नो कसिउ लुँ हाइचिके," है ओरादोक ते, लाजरसए ओनाना मार्थाए, "आवलाई गेगादैव चार दिन ताधुके, प्रभु। गेफैकिन उसी डर्न्या ले," है ओदोक ते, 40 येसुए, "नँलाई नयुँ उहुपूकिन परमेस्वरए ओज़गै रँःन्या नले है डादीव माःक रो?" है ओदोव प्राइँना, 41 उपुर्कावराए नो कसिउ लुँ हाइकेर। हाःत ज़ येसुए

नमदा परमेस्वरए ल्योदा भाल्सिद, “अ परमेस्वर डाबाबु, नँलाई धन्याबाद लिज्या, आव डाबिन्ती नथैधुके। 42 डापाँ भरी थैव ज़ ननैज़्या लिन्या डासैज़्या। खाली आक लिज्याव मिँराए आव डापाँ थैद नँ ज़ नपरीनाव घथरैनारक लिद है डादीज़्या,” है दाद, 43 येसु बनै चोइस क्रिद, “लाजरस, ननी पुलुसुद हुनके,” है ओदोव प्राइँना, 44 नो सिउ लाजरस ओडैनी उखँड पै लुम्बैसिउ क्वारास पुलुसुके। हाःत ज़ येसुए नक लिज्यावरालाई, “ओक्वार पलाःद्याद बाव एचिके,” है यादोक्यो।

45निताव रँःद नो मरियमलाई चिऊना हुव यहूदीराए मनी कुधुए ज़ येसुलाई यायुँ हुपुके। 46 ख्वाराए फरी येसुए ओदोव येन भरी रँःद फरिसीरालाई है यारादोनाकेर।

येसुलाई सैःन्या गुमुस्ता

(मती २६:१-५; मर्कूस १४:१-२; लूका २२:१-२)

47नो फरिसीर सोनो मुख्या पुजारीराए घ्योःव कचरी जैद, “गे कै लिन्या ओताव? आवए ते कुधु अचम्बलाव येनर दोज़्याव। 48 नोलाई मावैद दोव गेएकिन, मिँ भरी ओपोःस ज़ नोलाई यायुँ हुपुद ओल्योदा बान्या लेर। नदा याबाकिन रोमी सरकारए उसिपाईर हुद गेध्यान झिमलाई तैःद्याद गे यहूदीरालाई मनी खेमन्या ओछ्यास लिज्या,” है लिकेर। 49 हाःत ज़ कैयाफा यादोज्याव हो साललाव प्रधान पुजारीए, “जे काता ज़ मासैन्यार जेलिज्या। 50 गेदेस भरी उमिन ओमाज़्याव देखा बुरू प्राइँए जूँनी तोबो मिँ सिन्या लेखा लिज्या लिन्या जेमासैए रो?” है लिके। 51 नोए निताव ओपाँव ओलनी ते माःक। येसुए यहूदी जातलाव मिँराए जूँनी उजिउ झाःद याएरिज्याव लिन्या परमेस्वरए डादा ज़ नो प्रधान पुजारीए ओयाःत झाःद ओयोनी ज़ ओपाँव ची। 52 येसुए उजिउ ओझाःरिज्याव यहूदीराए जूँनी वाज़ माःक, संसार भरिलाव काना कुनीड लिज्याव

परमेस्वरए उमिनतावरालाई तोबो ज़ जैन्याए जूनी ब ओल्यो। 53 हो छचामकिन ज़ येसुलाई कातानी सैःन्या लिद गुमुस्ता दोनाकेर। 54 है जैद हाःकिन येसु यहूदियाल मासरैःसिद ननी पुलुसूद उसिसरास बन छचोकाव एफ्राइम यादोज़याव नाखारल लिनाकेर। 55 हाः बेलाक यहूदीराए यामानिज्याव निस्तार पर्व हुनाद उलिज्याव। है जैद नो पर्वए जूनी मिँर ड़ादा ज़ नाखार नाखारनी यरूसलेमल बाद हुसिद याचोखोइसिनाज्याव। 56 नोर ध्यान झिमल याहुवत येसुलाई मारैःद या याल ज़, “जे कै जेलिज्या, नो मिँ आव पर्वल जाँ ओमाहुरिज्याव सा,” है लिकेर। 57 फरिसीर सोनो मुख्या पुजारीराए येसुलाई क्योःन्याए जूनी ड़ादा ज़ नल हुवरालाई, “येसुलाई जेरैःकिन गेलाई है दासिच्यो,” है दाद यारानैज्याव।

12

मरियमए येसुए उखँत मास थीद ओयो

(मत्ती २६:६-१३; मर्कूस १४:३-९)

1 येसु निस्तार पर्वकिन छ दिन ओड़ाल बेथानियाल बाके। नल नो सिउनी ओसोचोइव लाजरसए ओल्योक ज़ लिनाके। 2 नोराए येसुए उजूनी रिमकाव ज़यावर थिक थाक जैद मारथाए ज़यावर भाःद ओराएज्याव। लाजरस फरी येसुस ज़यान्याए जूनी चुसिद उलिज्याव। 3 हाः बेलाक मरियमए बनै ओएः ल्यो चाव सी डरो जतामसीए मास तर्याःवा रैद येसुए उखँत थीद्याद ओचेमए सीदिक्यो। झिम भरी ज़ बनै चाव सी फाँ फाँ डर्के। 4 नाःत ज़ छीनी येसुलाई धोका याज्याव उसिस यहूदा इस्करियोतए, 5 “बुरू आव मास सोंसय चाँदीए सिक्काल योःद काता ज़ माल्योरालाई भाःद ओराएकिन तान्या ओल्यो,” है लिके। 6 खाली नोए माल्योराए जूनी उयुँ नाद है उलिज्याव ते माःक, ओल कुन्याए जूनी है उलिज्याव ची। याखार्ताव पैसा ओल ज़ ओनैज्याव, ननी कुव येन ओदोज्याव। 7 हाःत ज़ येसुए, “घदोज्यावक। ड़ालाई गादैन्या छचामकावए

जूनी सामा दाद ओनैव ची। ⁸ काता ज़ माल्योर ते जेस एकतार ज़ लिज़्यार, डा ते जेस एकतार लिन्या डामाले,” है यादोक्यो। थ्येसु नक लिज़्या दी लिन्या थैद नजीलाव यहूदीर कुधु ज़ ओल्योक हुकेर। नोर येसुए उजूनी वाज़ याहुव माःक, नो सिउनी ओसोचोइव लाजरसलाई चिऊन्याए जूनी ब हुद यालिज़्याव। ¹⁰ है जैद ज़ मुख्या पुजारीराए लाजरसलाई ब सैःव पैकेर। ¹¹ काराव ल्यो ताकिन येसुए नोए ओक्याँताव ओदोव येननी ज़ यहूदीर कुधु ज़ मुख्या पुजारीरालाई रासूद येसुलाई यायुं हुपनाके।

येसुलाई परमेस्वरए उमिनताव राजा याजैव

(मत्ती २१:१-११; मर्कूस ११:१-११; लूका १९:२८-४०)

¹²हो पराःती नो पबर्त हुव माहोल्थार ‘येसु यरूसलेमल हुज़्या दी’ लिन्या थैद, ¹³नोराए खजुर सीए ओस्यावलार रैद येसुस दैसिनाद, “होसन्ना! परमेस्वरए उमिनत हुव इस्त्राएलीराए याराजा धन्याकाव ओताक,”

है लिद क्रिकेर। ¹⁴ येसु तोबो गधाहाए ओबछेरा चेपूद उहुज़्याव। नोए उजूनी धर्मसास्त्रल इताव सर्सिउ उलिज़्याव,

¹⁵“ताछेःनी सियोनए ओज़ा,*

नराजा गधाहाए ओबछेरा चेपूद हुज़्या।”

¹⁶नो बेलाक येसुए उसिसराए नो पाँर माबुझिधुकेर। येसु स्वर्गत ओल्द ओबाव छीनी वाज़ नो धर्मसास्त्रलाव सर्सिउ पाँर चेतैद ‘नो पाँ गेसयोःधुव ची ओल्यो’ लिन्या सैकेर।

¹⁷नो माहोल्थारानी जो जोराए येसुए लाजरसलाई खादरनी क्रिद सिउनी ओसोचोइव रँःद नैर, होराए प्राइँलाई ज़ है यारादोज़्याव।

¹⁸ होए उजूनी ज़ येसुए नाःल्दिउ येन ओदोव ओल्यो लिन्या थैद निताव ल्यो माल्यो मिँर ओलस दैसिहुकेर। ¹⁹ निताव रँःद

12:8 12:8 ब्य १५:११ 12:13 12:13 भज ११८:२५-२६ * 12:15 12:15 छुत बुझिन्या — यरूसलेमलाव मिँर। 12:15 12:15 जक ९:९

फरिसीर या याल, “आव मानुवाताव मिँ भरी ओपोःस ज़ नोए ओपाँत बाज़यार, गे ते अबकिन नोस कातानी ज़ गेमाधुके ब,” है लिकेर।

येसु उसिन्याए जूनी डादा ज़ ओपाँव

20नो पर्ब मानिना हुवर ख्वार ग्रीक यारादोज़्यावर मनी याल्यो।
 21नोर गालीललाव बेथसेदा नाखारलाव फिलिपए ल्योक बाद, “अ सेर, गे येसुस तखेप दैसिउ गेपैज़्या,” है यादोक ते, 22फिलिपए नो पाँ फरी अन्द्रियासलाई मनी है दोक्यो। है जैद नोनी नेब्लो ज़ येसुए ल्योक बाद नो पाँ है दोकिनी। 23 हाःत ज़ येसुए नक लिज़्यावरलाई, “अब ते परमेस्वरए डा मिँ मिन्सिउए डामिनलाई सध्योःघान्या बेला हुके। 24 डा जेलाई साचो है डादाचिज़्या, तोबो तामए ओसै गमल बाद ओमासिवा पै हाःकाव ज़ लिज़्या। गमल बाद उसिउत वाज़ कुधु ओसै झाःज्याव। 25 हिताव ज़ जोए उजिउए मया दोज़्याव, होए उजुनीलाई समैज़्याव। फरी जोए आव जुनील उजिउए मया मादोव, होए उजिउलाई अजम्बरी जुनीए जूनी जोगोइद नैज़्याव। 26 जोए डासेवा दोव पैज़्याव, हो डाछींत उहुक। हो ताकिन ची डा जोड जोड डाताज़्या, नो डासेवा दोज़्याव ब होड डास ज़ तान्या ले। जोए डासेवा दोज़्याव, होलाई परमेस्वर डाबाबुए मनी ओमान नैघान्या ले,” है यादोक्यो।

27हाःत ज़ फरी, “डा आख बनै धो थाइव ताद डाले। डा कै लिन्या? सैं डाबाबुलाई, ‘अ बाबु, आव डाक्याँत हुरिज़्याव दुखरानी जोगोइनाके,’ है दान्या ओताव? हिताव ते माता, डा नो दुखर सहिद सयोःना डाहुव ची,” है लिद, 28 “अ बाबु, अब ते घ्योःव नमिन सरैःके,” है लिद ओपोःखारिउ प्राइँना नमतिन तोबो गाए, “डामिन ते डारैःधुके, फरी झन ज़ सरैःन्या डाले,” है उलिज़्याव थासके। 29 नक लिज़्याव माहोल्याराए नो गा थैद ख्वाराए ‘नम गर्जिज़्या’ है लिकेर, ख्वाराए फरी ‘येसु परमेस्वरए ओचाकर्यास ओपाँज़्याव ची’ है लिकेर। 30 हाःत ज़ येसुए, “आव जेथैव गा

डा डार्जनी माःक, जे डालाई सरेस्न्याए जूनी ची। ³¹ अबकिन आव मानुवाताव मिँर फाल्सिरिज्यार, यासेर सैतान मनी ख्यासिद उमिन मारिज्या। ³² सोनो डा आव नामनी छीसिद डातङ्गैसिउत प्राई मिँरालाई डाल्योदा डारारैरिज्या,” है यादोक्त्यो। ³³ नो है ओल्यो भरी ओल उसरिज्यावए जूनी ज़ ओपाँव।

³⁴नो माहोल्याराए, “धर्मसास्त्रल गेचिऊक नो बाँचेना हरिज्या है यालिज्याव खीस खर्क ज़ सिन्या माले लिन्या लिज्या। नँ कै जैद मिँ मिन्सिउ तङ्गैसिद सिरिज्या है नलिज्याव? नो मिँ मिन्सिउ सु?” है यादोक्त्ये, ³⁵ येसुए, “अङ्ग छ्यावा पै वाज्ज डाज्जगै जेखार्ल रहिरिज्या। नो ज़गै जेखार्ल ओलेवा भरी नो बेला ताचुकैक्त्यो, मानी चुम चुमोल जेपरिया। नल जेपरिकिन ‘आदा डाबाज्या’ लिन्या ब सैन्या जेमाले। ³⁶ है जैद नो ज़गै उलिज्याक ज़ ज़गैवलाई जेयुँ उहुप्क। हो ताकिन ची ज़गैवए ओथोर जेतारिज्या,” है दाद येसु ननी पुलुसद समैसिनाके।

यायुँ माहुपज़्याव यहूदीर

³⁷येसुए मिँराए ड़ाक अचम्ब अचम्बलाव येनर दाद ब नोराए यायुँ ज़ माहुप्के। ³⁸ ननी ज़ यसैया अगमबक्ताए ओसरो योःके। नोए ओसरो आव ज़,

“प्रभु, गेरासथैव पाँत सुए यायुँ ज़ माहुप्के।

परमेस्वरए सतैद ओरायो ओसक्तीलाव येनर ब सुलाई ज़ माताके।”

³⁹नितावनी ज़ नोराए यायुँ माहुप्के। यसैयाए फरी ब तोथोल अइ लिद सर्द नैव,

⁴⁰“परमेस्वरए नोरालाई मुन्दुक्यासो जैद यानैव,

यायुँ ब बनै खाव जैद नैद यायो।

है जैद ज़ यामी लिज्यावत ब मारैःधुर,

थैद ब यायुँल मातीधुर।

ननी ज़ नोर डाल्योदा यायुँ फर्केद सगराँसिना माहुर।”

41यसैयाए डादा ज़ ख्रीसए ओज़गै रँ:द आव पाँ भरी ख्रीसए उजूनी ज़ सर्द ओनैज़्याव। 42 हैदी ब यहूदीराए यासेरर कुधुए यायुँ हुपके। खाली ‘धर्मसास्त्र झिमनी फरिसीराए पले:सिर्या’† लिद याछचाचेए पाखात मापाँधुकेर। 43 नोराए परमेस्वरनिकाव दैन्या स्याबासकिन मिँनिकाव दैन्या स्याबास घ्यो:व रँ:केर।

44हा:त ज़ येसुए बने चोइस अइ लिद यासथैक्यो, “जोए डालाई उयुँ हुपज़्या, होए डालाई वाज़ मा:क, डालाई परीज़्यावलाई मनी उयुँ हुपज़्या। 45 हिताव ज़ फरी डालाई रँ:ज़्यावए डालाई परीज़्यावलाई ब रँ:ज़्याव। 46 डा आव मानुवाताव ज़गै ताद डाहुके। डालाई यायुँ हुपन्यार चुम चुमोल तान्या मालेर। 47 फरी डापाँ थैद माभै:ज़्यावरालाई डा याखत पले:घाव मापरिए। डा आव मानुवाताव मिँरालाई याखत पले:घाद सजा याना डाहुव मा:क, बाँचैना डाहुव ची। 48 हैदी ब डालाई सोद डापाँ माभै:ज़्यावरालाई याखत सतैघान्या डापाँ ज़। नो डापाँ ओमाभै:वए, फाल्सिन्या छचाम ननी ज़ फाल्सिरिज़्या। 49 नो डापाँ डानी सिर्जेद डापाँव मा:क, डालाई परीज़्याव डाबाबुए ‘आव पाँनिके’ है ओदाँव ची। 50 ओल डालाई पाँव उपरीनाव भरी अजम्बरी जुनी यान्या लिज़्या। है जैद डापाँज़्याव भरी परमेस्वर डाबाबुए है ओदाँव वाज़ डापाँज़्या।”

13

येसुए उसिसराए याखँर हर्द ओरायो

†निस्तार पर्बए ओडादा येसुए, ‘आव मानुवानी पुलुसूद परमेस्वर डाबाबुए ल्योदा बान्या बेला ताके’ लिन्या सैक्यो। ओमासिवा पै

आव मानुवाताव ओल उमीरालाई मया दाव ज़ ओरानैज़याव ।

2हो छचाम रिमक येसु उसिसरास ज़यावर याज़युज़यावकिन डादा ज़ सिमोनए ओज़ा यहूदा इस्करियोतए उयुँल सैतानए येसुलाई धोका यान्या युँ जैद नैद ओएज़याव । 3 हाःत ज़ येसुए उयुँल, 'परमेस्वर डाबाबुए प्राइँ डाकुइत ज़ याद नैनाव, ओल्योनी ज़ डाहुके, फरी ओल्योदा ज़ डाबारिज़या' है लिन्या ओसैज़यावए, 4 उसिसराए याडाक नो ज़यान्यार याज़युज़याव बेलाक ज़ याखार्नी च्याँःसिद ओबर्की हाइद रूमाल भिरिसिद, 5 तोबो जाल री झाःद, उसिसराए याखँर हुर्द्याद नो उभिरिसिउ रूमालए ज़ याखँर सीद ओराएज़याव । 6 है जैद याखँर हुरे हुरे सिमोन पत्रुसए ल्योक उहुवत पत्रुसए, "प्रभु, नँ कै जैद इतावए डाखँ हुर्द्याव नपैज़याव?" है ओदोक ते, 7 येसुए, "आव डादोज़याव येन आख ते नमासैए, छीनी नसैया," है ओदोक ते, 8 फरी ब पत्रुसए, "नँ डाखँ खर्क ज़ हुर्द्यान्या माताए," है ओदोक ते, येसुए, "नँ नखँ हुर्द्याव भैःद नमायाँकिन नँ डासकाव तान्या नमाले," है दोक्यो । 9 हाःत ज़ सिमोन पत्रुसए, "हो ची ताकिन्दा प्रभु, डाखँ वाज़ माःक, डाकुइर डाडैर ब हुर्द्याव ताके," है ओदोक ते, 10 येसुए, "हुर्सिउ मिँ ओक्याँ भरी छैँव ओतावए उखँ वाज़ हुर्द्याकिन ताए । जे भरी प्राइँ छैँवर ज़ जेलिज़या । हैदी ब जेखार्ल तोबो ते माछैँव लिज़या ।" 11 येसुए ओललाई धोका याव पैज़याव मिँलाई डादाकिन ज़ सरेस्द ओनैज़यावए नो माछैँवए उज्नी ज़ पाँके ।

12 येसुए याखँ हुर्द्याद डादाडाव ओहाइव ओक्वार जासिद फरी यास ज़ ज़यान्याल चुसिद है यादोक्यो, "आव जेखँ हुर्द डायाचिउ येनए ओअर्थ जेमासैज़याखेहो । 13 जे डालाई 'गुर्बा' सोनो 'प्रभु' है जेदाँज़याव, नो ते थिक ज़ । है जेलिज़याव मिताव डा हो ज़ । 14 खाली डा जेप्रभु जेगुर्बा ताद जेखँ हुर्द डायाचिज़या ल्यो ताकिन जे मनी

तोबोए तोबोलाई उखँ हुर्घाव ताके। ¹⁵ डा डादोज्याव मिताव येन जे मनी 'जेदोया' लिद नो येन जेडाक सतैद नैद डायार्चिए। ¹⁶ डा जेलाई साचो है डादाचिज्या, छुतए ओयेन दाज्याव मिँ ओसाहुकिन घ्योःव माताए। हिताव ज़ येनदा परीसिउ मिँ परीज्यावकिन घ्योःव माताए। ¹⁷ है जैद जे आव डापॉर तीद ननी ज़ जेदोकिन असिक दैवर तान्या जेले।

¹⁸“खाली आव पाँ प्राइँए जेजूनी ते माःक। हैदी ब डाछॉतिचिउ भरिलाई ते डा ज़ डासरेस्चिज्या। आव पाँ धर्मसास्त्रलाव सर्सिउ पाँ सयोःन्याए जूनी लिज्या। नलाव सर्सिउ आव ज़, 'डास सिप ज्युज्याव ज़ डाकिन तँदा जैसिरिज्या।'

¹⁹आव पाँ भरी ओमाहुद डादा ज़ है दाद डानैचिज्या। हो ताकिन ची नो पाँ भरी ओतावत डालाई 'हो ज़ ची ओल्यो' लिद सरेंसून्या जेले। ²⁰ डा जेलाई साचो है डादाचिज्या, जोए डापरींव मिँलाई ओल्योक हुव एज्याव, होए डालाई मनी हुव याँज्याव। डालाई वाज़ माःक, डालाई परीज्यावलाई ब हुव एज्याव।”

येसुलाई धोका याज्याव मिँ

²¹नाः है दाद येसुए उयँर धो थाइव ताद ओपाँ भरी काता ज़ मामोंद उसिसरालाई, “डा जेलाई साचो है डादाचिज्या, जेनी तोबोए डालाई धोका याँरिज्याव,” है ओरादोक ते, ²² 'काताकाव गेताव' लिद उसिसर या याल चिऊसिकेर। ²³ नो बेलाक येसुए उयँलाव मिताव तोबो उसिस ओक्याँत खदेप लिद उलिज्याव। ²⁴ सिमोन पत्रुसए नोलाई सान दाद्याद, “नो सु है दोसाँ,” है ओदोक ते, ²⁵ नोए येसुए ओक्याँत कँ लिद, “प्रभु, नो सुकी?” है ओदोक ते, ²⁶ येसुए, “आव भरेस जोलाई चिपल छोइद डाएज्या, हो ज़,” है दाद नो भरेसलाई केःद छोइद सिमोन इस्करियोतए ओज़ा यहूदालाई एक्यो। ²⁷ भरेस ओक्योःव प्राइँना ज़ सैतान उयँल पसिके। है जैद येसुए नोलाई, “नँ

दान्या नपैज्याव चाँदो ज़ दोके,” है दोक्यो। ²⁸ नो ज्यान्याल चुसिद लिज्यावराए, “काताए जूँनी नै ओल्यो?” लिन्या मासैकेर। ²⁹ रूवा रूवाराए, याखार्ताव पैसा यहूदाए ओक्याँत उलिज्यावए, “पर्बए जूँनी कातार लँ:नाव उपरीज्याव ताक्या, सैं काता ज़ माल्योरालाई पैसार यानाव उपरीज्याव ओताव,” लिन्या सम्जिकेर। ³⁰ यहूदा नो भरेस ज्याद बेहार ज़ पुलुस्के। नो बेलाक री ताद उलिज्याव।

येसुए सा:रो कानुन ओरायो

³¹ इस्करियोत उपुलुसो छीनी येसु ओल उजूनी अइ लिद पाँके, “अब ते मिँ मिन्सिउए उमिन ब रैं:रिके, परमेस्वरए उमिन ब नोए ओक्याँनी ज़न ज़ रैं:न्या ले। ³² परमेस्वरए उमिन नोए ओक्याँत रैं:न्या ओतावए, ओल परमेस्वरए मनी नोस उलिज्याव सरैं:न्या ले। नो येन परमेस्वरए हतपूत ज़ दान्या ले। ³³ अ डाबाबुज़ार, अब डा जेस कोसै लिन्या डामाले। डाबाव छीनी जे डालाई खिमन्या जेले। खाली यहूदीराए यासैररालाई है डारादोव मिताव जेलाई मनी है डादाचिज्या, डा डाबाव पोड जे हुधुन्या जेमाले। ³⁴ डा जेलाई तोबो सा:रो कानुन डायचिज्या — जे जेल मया दासिच्यो। किताव डा मनी जेलाई मया डादाचिउ, हिताव ज़ जे मनी जे जेल मया दासिच्यो। ³⁵ निताव जे जेल मया जेदासिकिन, ‘डासिसर ज़ जेल्यो’ लिन्या प्राइँए सरैसून्या लेर।”

पत्रुसए ओयेन येसुए ड़ादा ज़ है ओदोव

(मती २६:३१-३५; मर्कूस १४:२७-३१; लूका २२:३१-३४)

³⁶ हा:त ज़ सिमोन पत्रुसए, “प्रभु, नँ काना नबाज्याव?” है ओदोक ते, येसुए, “आव बेलाक ते डा डाबाज्यावदा नँ बाधुन्या नमाले, छीनी ते हुन्या ज़ नले,” है ओदोक ते, ³⁷ पत्रुसए, “कै जैद प्रभु, डा नँस माबाधुन्या? डा नजूनी सिन्या ब तयार ज़ डालिज्या,” है ओदोक ते, ³⁸ येसुए, “हुकी, डा डाजूनी नजिउ झा:द्यान्या तयार नलिज्याव रो? डा ते नँलाई साचो है डादीज्या, भाल्या ओमाकोद ज़ डालाई

सोंखेप 'डामासरेसे' है दान्या नले," है दोक्यो।

14

परमेस्वरए ल्योदा बान्या येम येसु ज़

1“जे जेरुँर तासतेच्यो, परमेस्वरलाई जेरुँ उहुपूक। डालाई मनी जेरुँ उहुपूक। 2 परमेस्वर डाबाबुए उझिमल लिन्या पो कुधु ज़ लिज्या। हिताव ओमाल्यो ताकिन है मनी डामादाचिखेहो। नो डापाँ हैज़ ओतावए जेरुँनी जेपोर बनैनाद डयाचिज्या। 3 जेरुँनी पोरा स्यासी डाजैवत डा फरी जेलाई चाना डाहुरिज्या। हाःकिन जे डाल्योक डास सिप ज़ तान्या जेले। 4 डा डाबाज्याव येम जे ब जेसैज्याखेहो।”

5हाःत ज़ थोमाए, “प्रभु, नँ काना नबाज्याव गे गेमासैए, झन नो नयेम कै जैद गेसैरिज्याव?” है ओदोक ते, 6 येसुए, “येम ब डा ज़, साचो पाँ ब डा ज़, अजम्बरी जुनी याज्याव ब डा ज़। डाकिन छुतनी सु ज़ डाबाबुए ल्योड माकेसुधुर। 7 डालाई जेसरेसनाव ताकिन डाबाबुलाई मनी सरेसुन्या जेल्यो। आकिन ते जे डाबाबुलाई सरेसुन्या जेले, जेमीए ज़ जेरुँःधुके।”

8हाःत ज़ फिलिपए, “प्रभु, गेलाई परमेस्वर नबाबु सतैद्यासिके, गेपैज्याव नाः ज़,” है ओदोक ते, 9 येसुए, “डा आःपै जेस ज़ लिज्यावत ब नँ कै जैद नमासरेसुनाज्याव, फिलिप? डालाई रँःवए परमेस्वर डाबाबुलाई ब रँःक्यो। कै जैद नँ डालाई रँःद मनी 'नबाबु परमेस्वरलाई सतैद्यासिके' है नदाँज्याव? 10 'डा डाबाबुस डालिज्या, डाबाबु डास लिज्या' लिन्या पाँत नयुँ माहुबे रो? डा जेलाई है डादाचिज्याव पाँ भरी डानी सिजैद डापाँज्याव माःक, डाक्याँत लिज्याव डाबाबुए ओयेनर डानी ओदोज्याव ची। 11 'डा डाबाबुस डालिज्या, डाबाबु डास लिज्या' लिन्या पाँत जेरुँ उहुपूक। नो पाँत जेरुँ ओमाहुपूदी ब डादोव येननी ते जेरुँ सुहुपूचिके।

12“डा जेलाई साचो है डादाचिज्या, डालाई उयुँ हुपूज्याव मिँए

डादोज़्याव मिताव येनर दोरिज़्याव। डा डाबाबुए ल्योदा बाद नोस डालिरिज़्यावए होए झन नोकिन घेप्पा येनर ब दोरिज़्याव। ¹³ जे परमेस्वरलाई डा डामिननी जो है जेदोदी ब नो येन डा सयोःघान्या डाले। ननी ज़ परमेस्वर डाबाबुए ओज़गै ओज़ाए डाक्याँत रँःन्या ले। ¹⁴ जे डामिननी डालाई कातार है जेदाँकिन नो दान्या ज़ डाले। ¹⁵ जे डालाई मया जेदाँकिन डा है डादाचिउ पाँर दान्या जेले।”

छैंव पुरुसए जेक्याँत बास दान्या ले

¹⁶ “डा डाबाबु परमेस्वरलाई जेजूनी तोबो है दाद डयाचिरिज़्या। होए जेलाई सघैन्या तोबो परींघाचिरिज़्याव। नो एकमन्या जेस ज़ लिन्या ले। ¹⁷ नो सतलाव छैंव पुरुस ज़। नोलाई आव मानुवाताव मिँराए यामारँःव यामासरेसोए मादैधुर। जे ते जेस लिद जेक्याँत बास ओदोहुरिज़्यावए जेसरेसूज़्या। ¹⁸ डा जेलाई जेबाबु जेआमा माल्यो मितावर जैद ते डामारख्यानैचिए। फरी जेल्योक डाहुरिज़्या। ¹⁹ छ्यावाकिन आव मानुवाताव मिँराए डालाई रँःन्या मालेर, जे ते रँःन्या ज़ जेले। हाःकिन डा खर्क ज़ मासिन्या डातावए जे मनी सिउका सिउ तान्या जेमाले। ²⁰ हो छ्याम, ‘डा डाबाबुस डालिज़्या, जे डस जेलिज़्या, डा जेस डालिज़्या’ लिन्या सैन्या जेले। ²¹ जोए डापाँ थैद दोज़्याव, हो ज़ डालाई मया दाज़्याव मिँ। जोए डालाई मया दाँज़्याव, होलाई डाबाबुए मनी मया दोज़्याव। डा मनी होलाई मया दाद ओल्योक सरैःसिन्या डाले।”

²² यहूदा इस्करियोतए माःक, छुत उसिस यहूदाए, “प्रभु, काराव आव मानुवाताव मिँराए ल्योक मासरँःसिन्या, गेल्योक वाज़ सरैःसिउ नपैँज़्याव?” है ओदोक ते, ²³ येसुए, “डालाई मया दाज़्यावए वाज़ डापाँ दोज़्याव। डाबाबुए मनी नोलाई मया ओदोःज़्यावए गिन नोए ल्योक हुद नोस बास गिनदोरिज़्या। ²⁴ डालाई मया मादाज़्यावर ते डापाँ माभैःर। हैदी ब नो जेथैँज़्याव

डापाँ डानिकाव माःक, डालाई परींज्याव डाबाबु परमेस्वरए ल्योनी हुव ची।

25“आव पाँ भरी जेस डालिज्याक ज़ है दाद डानैचिए। 26 छीनी परमेस्वर डाबाबुए डा डामिननी जेलाई सघैन्या छैव पुरूस परींघाचिरिज्याव। नो जेस लिद प्राईँ पैचिरिज्याव। आव डापाँर मनी याका दाव परींचिरिज्याव। 27 युँ होलाँ तान्या डाअसिक जेलाई याद डाख्यानैचिरिज्या। नो डाअसिक आव मानुवातावराए यान्या मिताव ते माःक। जेरुँर सतेद ताछेःच्यो। 28 ‘डा डाबाज्या, फरी डाहुरिज्या’ लिन्या डापाँर थैव ज़ जेलिज्या। जे डालाई साचो मया जेदाँज्याव ताकिन डा डाबाबुए ल्योदा डाबारिज्या है डालिक जेरेंखेहो। नो डाबाबु डाकिन घ्योःव लिज्या। 29 आव भरी ओमाताद ड़ादा ज़ जेलाई है दाद डानैचिए। नो ओताव जेरेंःवत जेरुँ हुपन्या ले। 30 अब ते डा जेस कोसै पाँव दैन्या डामाले। आव मानुवातावराए यासैर सैतान हुनाके। उहुदी ब डाक्याँत ओहक ते माले। 31 खाली आव मानुवाताव मिँराए, डा डाबाबुलाई मया दाद है ओदाँव भरी डादोज्याव घसैरक लिद सरेंःघाव ताके,” है लिद उसिसरालाई, “च्याँःसिचिके, गेबा,” है यादोक्त्यो।

15

जोम्परसैए ओअर्थ

1“डा जोम्परसैए साचो ओजरा ज़, डाबाबु जोम्परसैए ओर्गे ज़। 2 डाक्याँताव यासै माझाःज्याव खार भरी डाबाबुए यालोःज्याव। फरी यासै झाःज्याव खार भरी झन ज़ घझाःवक लिद नत ताज्याव तके दँ जोखारीर ब याचमज्याव। 3 हो मिताव ज़ जे ते है डादाचिउ पाँए जेक्याँताव माचाव भरी हाइद ख्याद छैँवर जेताधुके। 4 है जैद जे डास ज़ लिचिके, डा जेस ज़ लिन्या डाले। किताव जोम्परसैए ओखार ओक्याँत जोरैसिउ ओमालिकिन ओसै ब माझाःव, हिताव ज़ जे मनी डाक्याँत जेमालिकिन जेसै ज़ झाःन्या जेमाले।

5“डा जोम्परसैए ओजरा ज़, जे ओखारर ज़। जे नो खार माँ:ती डाक्याँत जेलिकिन डा मनी जेस ज़ तान्या डाले। ननी ज़ बनै जेसै ल्योर तान्या जेले। डा जेस डामालिकिन जेनी काता ज़ दाधुन्या जेमाले। 6 डाक्याँत मालिज़्यावर ते पल्द ख्यासिउ खार उथँव मिताव अनाकलावर तान्या लेर। निताव खारर दुप्द में:ल झा:द चुयाप जैन्या वाज़ ताज़्या। 7 खाली जे डाक्याँत लिद डापाँर भै:द जेयुँल जेनैकिन, जो जेपैदी ब दैन्या जेले। 8 जे बनै जेसैर झा:द डासिसर तान्या मितावर जेताकिन परमेस्वर डाबाबुए उमिन ननी ज़ घ्यो:न्या ले।

9“किताव डाबाबुए डालाई मया दाँज़्याव, हिताव ज़ डा मनी जेलाई मया डादाचिज़्या। है जैद जे डामयाल ज़ लिच्यो। 10 डापाँ भरी भै:द जेदोकिन, जेल्योदा लिज़्याव डामयाल ज़ लिन्या जेले। डा मनी परमेस्वर डाबाबुए ओपाँ भरी भै:द दाद डाल्योदा लिज़्याव ओमयाल ज़ डालिज़्या। 11 डाल्योनिकाव होलाँ तान्या युँ जेस ओताक, सोनो नो होलाँ तान्या प्राइँत ओयो:क लिद आव पाँ भरी है दाद डानैचिए।

12“जेलाई ख्यानैद डयाचिज़्याव दान्या येन आव ज़, किताव डा जेलाई मया डादाचिउ, हिताव ज़ जे मनी तोबोए तोबोलाई मया दासिच्यो। 13 नै मेंए ल्योदा मया उलिज़्याव आनी ज़ रै:ज़्या — जोए ओनैए उज्जनी उजिउ झा:ज़्याव, हो ज़ प्राइँरानी घेप्पा मया। 14 जे है डादाचिउ पाँल जेलिकिन, जे डानैर ज़ जेताज़्या। 15 आकिन ते जेलाई डाबाँदार है डामादाचिए। ओबाँदारालाई ते यासाहुए ओदाँजीं प्राइँ सतैद मारायो। डा ते डाबाबु परमेस्वरए ल्योनी डादैव भरी ओपो:स ज़ सतैद डयाचिउए जेलाई डानैर है डादाचिज़्या। 16 जे फरी डालाई जे जेछाँतिनाव मा:क, बुरू डा जेलाई थंरिन्या सैर ओझा:नारक लिद छाँतिद डाखतैचिके। है जैद जे परमेस्वर डाबाबुस डा डामिननी जेनिउ भरी यान्या ले। 17 फरी ब नो दान्या

येन ज्ञ ख्यानेद डायचिज्या — तोबोए तोबोलाई मया दासिच्यो।”

जेलाई सोज्यावर

18“जेलाई आव मानुवाताव मिँराए यासोचिक नोकिन डादा डालाई यासोनाव लिन्या याका दोच्यो। 19 जे आव मानुवानी तावर जेताव ताकिन आव मानुवाताव मिँराए गेमींर लिद मया दाचिखेरहो। खाली डा जेलाई आव मानुवानी डाछाँतिचिउए जे आव मानुवातावर माःक। है जैद मानुवाताव मिँराए जेलाई सोचिज्यावर। 20 डादा है डादाचिउ पाँ आःपै याका जेदोज्याखेहो। छुतए ओयेन दाज्याव मिँ ओसाहुकिन घ्योःव माताए। है जैद नोर डाखिरी यापसिकिन जे जेखिरी ब पसिन्या लेर। हिताव ज्ञ डा डापाँ याभैःव ताकिन जे जेपाँ ब भैःन्या याल्यो। 21 खाली नोराए डालाई परींज्यावलाई यामासरेसज्यावए जे डामिनतावर जेतावए जेलाई दुख यान्या लेर। 22 डा आव मानुवात परमेस्वरए ओपाँ डामारासथैहुव ताकिन नोराए याखत ब माताखेहो। खाली अब ते नोरालाई काता निउँ ज्ञ माले। 23 डालाई सोज्यावराए डाबाबु परमेस्वरलाई ब सोज्यार। 24 हिताव ज्ञ फरी सुए ज्ञ यामादोताव अचम्बलाव येनर नोराए डाक डामादोव ताकिन ननी ब याखत माताखेहो। खाली निताव येनर रँःज्यावत ब डालाई यासोनाव प्राइँना डाबाबुलाई ब सोकेर। 25 नोराए निताव यायेननी धर्मसास्त्रलाव सर्सिउ पाँ सयोःज्यार। नलाव सर्सिउ आव ज्ञ,
'नोराए अनाकल ज्ञ सोनाकेर।'

26छींनी डा डाबाबु परमेस्वरए ल्योनी जेलाई सघैन्याए जूँनी सतलाव छैँव पुरूस परींद डायचिरिज्या। नो पुरूस डाबाबुए ल्योनी हुद डा डाजूँनी ताव पाँ भरिए गोहाई तारिज्या। 27 जे मनी डादाकिन ज्ञ डास जेल्योए जे ब डागोहाईर जेतारिज्या।”

16

1“जेयूरं ताक्र्याक लिद आव पाँर ड़ादा ज़ डासथैचिज़्या। 2 जेलाई इताव ब हरिज़्या — यहूदीराए धर्मसासूत्र झिमनी पलेचिरिज़्यार।* फरी जेलाई सैःन्या सजा याज़्यावर ‘परमेस्वरए ओयेन ज़ गेदोज़्या’ है लिन्या लेर। 3 निताव येन नोराए डाबाबुलाई ब यामासरेसोए, डालाई ब यामासरेसनावए दान्या लेर। 4 आव पाँ भरी जेलाई ड़ादा ज़ है ड़ादाचिज़्या। हो ताकिन ची जेलाई नितावर याहुक आव डापाँर याका दान्या जेले। नो पाँर आःपै जेस ज़ डाल्योए है डामादाचिताव।”

छैव पुरूसए ओयेन

5“अब ते डालाई परींज्यावए ल्योदा डाबारिके, खाली ‘नँ काना नबाज़्याव?’ है जेमादाँए। 6 आव है ड़ादाचिज़्याव पाँए जेयूरं माचाव जैद नैद्याचिउ। 7 खाली डा साचो ज़ है ड़ादाचिज़्या, डा आनी बान्या जेलाई पाथ लिज़्या। डा आनी डामाबाकिन जेलाई सघैन्या छैव पुरूस हुन्या माले। डा डाबावत वाज़ नोलाई परींद ड़ायाचिरिज़्या। 8 नो उहुवत आव मानुवाताव मिँरालाई यापाप सतैँद्याद, परमेस्वरए ओन्याय सोनो ओसजा आव ज़ लिद थरैद याएरिज़्याव। 9 नो सतैँद ओराएरिज़्याव यापाप ड़ालाई यायुँ ओमाहुबोनी ज़ ताके। 10 नो सतैँद ओराएरिज़्याव परमेस्वरए ओन्याय फरी डा जेड़ाकिन डाबाबु परमेस्वरए ओल्योक डाबावत रैःरिज़्या। 11 नो सतैँद ओराएरिज़्याव परमेस्वरए ओसजा फरी डा आव मानुवातावराए यासैर सैतानलाई ओपाहा झाःद्याद उमिन समैद ड़ायोत रैःरिज़्या। 12“अझ डा जेलाई है दान्या पाँर कुधु ज़ ओल्यो, खाली आवकिन कुधु ज़ है ड़ादाचिकिन जेयुँल नैधुन्या जेमाले। 13 नो छैव पुरूस उहुवत वाज़ नोए ज़ साचो पाँर थरैव परींद पैचिरिज़्याव। नोए ओल उयुँ स्यानी सिजैँसिउ पाँर पाँन्या माले, ओथैव वाज़ पाँन्या ले।

* 16:2 16:2 यूह ९:२२ चिऊन्या।

नोए ज़ हुन्या पाँर ब सतैद्यान्या ले। ¹⁴ नोए डा डाल्योनिकाव पाँर ओपोःस ज़ छर्लङ्ग सतैद्याद डामिन ब सध्योःद्याँरिज्ञ्याव। ¹⁵ डाबाबु परमेस्वरस लिज्ञ्याव भरी डा डामीं ज़। है जैद ज़ है डादाचिउ, 'नो पुरूसए जेलाई सतैद ओयाचिरिज्ञ्याव भरी डा डाल्योनी ज़ डा डाजूनी ज़ तारिज्ञ्या।' ”

जेसोगोर मेंःद जेयुँर होलाँ तान्या ले

¹⁶“आकिनी जाँवाक जे डालाई रँःन्या जेमाले। नकिन फरी जाँवाक वाज़ रँःन्या जेले,” है ओरादोक ते, ¹⁷ उसिसर या याल, “आव काता ओपाँजूयाव इताव — ‘छ्यावाकिन जे डालाई रँःन्या जेमाले, फरी छ्यावाक वाज़ रँःन्या जेले’ है लिज्ञ्या? सोनो, ‘डा डाबाबुए ल्योदा डाबारिज्ञ्या,’ है मनी लिज्ञ्या,” है लिकेर। ¹⁸ नोराए, “आव ‘छ्यावाक’ है ओल्यो काता ओताव? आव पाँ जाँ गेमाबुझिधुके,” है यालिज्ञ्याव। ¹⁹ हाःत ज़ येसुए ‘नो पाँर डालाई है दाव यापैज्ञ्याव ताखेहो’ लिद नोरालाई है यादोक्यो, “नो ‘छ्यावाक रँःन्या जेमाले, छ्यावाक फरी जेरँःनारिज्ञ्या’ है डादाचिउ पाँत काताए जूनी उलतानी पाल्ता जेताज्ञ्याव? ²⁰ नोए जूनी साचो ज़ है डादाचिज्ञ्या, आव पाँत जे ते जेसोगोए चिर्लनी बिर्ल घर्न्या जेले, मानुवाताव मिँर ते बनै रँःन्या लेर। खाली नो जेसोगो रँतल त्रोसिरिज्ञ्या। ²¹ किताव तोबो ज़ा दैन्या मेंमाए ज़ा दैन्या बेलाक घर्लिद दुख दैज्ञ्याव, फरी भाउज़ा उजर्मिउत नो मेंमा उदुखर मेंःद उयुँर होलाँ ताद रँज्ञ्या, ²² हिताव ज़ जे मनी छ्यावा पै वाज़ सोगो दान्या जेले। फरी जेस डादैसिउत जेयुँर होलाँ ताद रँःन्या जेले। नो जेरँत सुए ज़ जेनी नैद लाँधुन्या मालेर। ²³ नो बेला उहुवत जे डालाई सुधिउ परिन्या माले। डा जेलाई साचो है डादाचिज्ञ्या, डामिननी जो जेनिदी ब डाबाबुए नो याचिरिज्ञ्याव। ²⁴ आःपै ते जे डामिननी काता ज़ जेमानिताए। अबकिन ते निचिकेदा दैन्या जेले। हो ताकिन ची जेरँत

ब सयोःघान्या ले।”

येसुए उसिसराए यायुँ उहुबो

25“आःपै ते आव डापाँर जेस बिन्ज़ा बिन मितावनी ज़ डापाँके। तछा छीनी नो डाबाबुए उजूनी डापाँव पाँर ओपोःस ज़ छर्लङ्ग तारिज़्यार। 26 हो छचाम जे ज़ डामिननी निन्या जेले, डा जेजूनी डाबाबुस निद्याव मापरिए। 27 डा डाबाबुए ल्योनी डाहुव लिद जेयुँ हुपद डालाई मया जेदाँवए डाबाबुए मनी जेलाई मया दान्या ले। 28 डा डाबाबुए ल्योनी ज़ आव मानुवात डाहुके, फरी आव मानुवालाई रासूद डाबाबुए ल्योदा ज़ डाबारिज़्या,” है यादोक्यो। 29हाःत ज़ उसिसराए, “अब ते नपाँ बिन्ज़ा बिननी माजैद चावस ज़ पलासूद नयासिके। 30 अब ते गेसैके, नँ प्राई ज़ नसैज़्या, आकिन गे नँलाई सुधिउ ब मापरिके। नँ परमेस्वरनी हुव ज़ लिद गेयुँ मनी हुपके,” है यादोक ते, 31 येसुए, “डालाई बल्ल जेयुँ जेसुहुबो रो? 32 आव मनी थैच्यो, तछा इताव बेला हरिज़्या, नो बेला उहुधुव मिताव ब लिज़्या, जे जेछचाचेए चितराँ पुतराँ ताद सु सु जेझिमदा बाद डालाई डाबातड ज़ जेजैनारिज़्या। हैदी ब डा डाबातड डामाले, परमेस्वर डाबाबु डास ज़ लिज़्या। 33 आव पाँ भरी जे डास लिद जेयुँ होलाँ ओताक लिद डादा ज़ है दाद डानैचिए। जे आव मानुवात दुखर वाज़ दैन्या जेले। हितावत ब जेयुँर तासतेच्यो, डा आव मानुवालाई हारैद डानै,” है यादोक्यो।

17

येसुए ओल उजूनी ओपोःखारिउ

1येसु आव भरी पाँद नमदा भाल्सिद, “अ परमेस्वर डाबाबु, बेला योःहुके। डा नँ नमिन सघ्योःघान्याए जूनी डा नज़ाए डामिनलाई ब सघ्योःघाव ताके। 2 किताव नज़ालाई मिँ भरिराए याडैताव नजैनाव, आथ पाला मनी डालाई नयाँव मिँ भरिरालाई अजम्बरी जुनी यान्याए जूनी डामिन सघ्योःघाव ताके। 3 नोर अजम्बरी जुनी

दैन्या इतावनी ज़ ताज़्या — नँ तोबोका तोबो साचो परमेस्वरलाई सरैस्न्या सोनो डा नपरींनाव येसु ख्रीसलाई सरैस्न्यानी ज़। 4 डालाई 'दोयो' लिद नपरींनाव येन भरी सयोःद आव मानुवात नमिन ब सघ्योःद नैद डाईए। 5 अ बाबु, अब ते डालाई नँस ज़ नैद आव नाम नम ओमाताद नँस गिन्लिज़्याकाव डाज़गै फरी डालाई याँयो," है लिद पोंखारिक्यो।

येसुए उसिसराए जूनी ओपोंखारिउ

6“आव मानुवानी डालाई नयाँव मिँरालाई नमिन सतैद नैद डाराए। नोर नमीर ज़ याल्यो, नोर ज़ डालाई नयाँके। नोराए नपाँर भैःद ज़ लेर। 7 नँ डालाई नयाँव पाँ भरी नँनी ज़ हुव लिद नोराए सैद नैर। 8 नँ डालाई नयाँव पाँ भरी नोरालाई याद डारानै। नोराए नो पाँ भरी रैद डा नल्योनी हुव ज़ लिद थरैद, नँ ज़ डालाई नपरींनाव लिद यायुँ ब हुपूद ले। 9 नो डालाई नयाँव मिँराए जूनी डा पोंखारिउ ज़ डालिज़्या, नोर नमीर ज़। उपुर्कावराए जूनी ते डामादोए। 10 डास लिज़्याव भरी प्राई नमीर ज़, नँस लिज़्याव भरी ब प्राई डामीर ज़। नोराए याक्याँत ज़ डाज़गै रैःद ले। 11 अब ते डा आव मानुवात कोसै डामाले, नल्योदा डाहुरिज़्या। नो नयाँवर ते आव मानुवात ज़ डाराख्यानैरिज़्या। है जैद अ छैँव डाबाबु, नोरालाई नमिनत पाथस ज़ यानैयो। नँस गिन तोबो ज़ गिन्लिज़्याव मिताव नोर मनी तोबो ज़ ओतारक। 12 डा नोरास डालेवा पै नोरालाई खेर बान्यानी जोगोइद नमिनत पाथस ज़ डारानैके। खाली धर्मसास्त्रलाव पाँलाई सयोःन्याए जूनी तोबो नर्गए ओज़ा वाज़ खेर बाके। 13 अब ते डा नल्योदा डाहुरिके। खाली आव नयाँवराए यायुँर होलाँ ताद रेंद लिन्या ओतारक लिद डा आव मानुवालाई माख्यानैद ड़ादा ज़ डापोंखारिनिज़्या। 14 डा नोरालाई नँ नपाँ ज़ डाराएके। नोर डा मिताव आव मानुवातावर यामातावए मानुवाताव

मिँराए यारासोज़यार। 15 नोरालाई ‘आव मानुवानी नल्योदा यालाँके’ लिद ते डामापोँखारिए, खाली ‘झुकैज्याव सैताननी पाथस यानैयो’ है डार्दीज्याव ची। 16 किताव डा आव मानुवाताव माःक, हिताव ज़ नोर मनी आव मानुवाताव माःक। 17 नोरालाई साचो नपाँल सतस दान्या याखत माल्यो छैवर याजैयो। नँ नपाँ सतलाव लिज्या। 18 किताव डालाई आव मानुवात नपरीनाव, हिताव ज़ डा मनी नोरालाई मानुवात परींद डारानै। 19 नोर साचो नपाँल याखत माल्यो छैवर घतारक लिद डा नोराए जूँनी नयुँलाव मिताव येन दान्यात थाँसिद डाले।”

येसुए उमीराए जूँनी ओपोँखारिउ

20“आव डापोँखारिनिज्याव नोराए जूँनी वाज़ माःक, नोराए यापाँ थैद डाल्योदा यायुँ हुपूज्यावराए जूँनी पाला ज़। 21 अ परमेस्वर डाबाबु, किताव डा नँस डालिज्या, नँ डास नलिज्या, हिताव ज़ नोर मनी प्राइँ तोबो ज़ ताद गिनस खैवर ओतारक। हो ताकिन ची आव मानुवाताव मिँराए डालाई नँ ज़ नपरीनाव थरैन्या लेर। 22 गिन तोबो ज़ गिनलिज्याव मिताव नोर ब तोबो ज़ ओतारक लिद डालाई नयाँव ज़गै नोरालाई मनी याद डारानैए। 23 है जैद नोर प्राइँ तोबो ज़ ओतानारक, डा नोरास, नँ डास ओताक। ननी ज़ आव मानुवाताव मिँराए डालाई नँ ज़ नपरीनाव सैन्या लेर। सोनो किताव डालाई मया नदाँव, नोरालाई मनी मया नरादोज़याव सैन्या लेर। 24 अ बाबु, डालाई नयाँव मिँर जोड डालिज्या होड ज़ ओतारक है डालिज्या। हो ताकिन ची डालाई नयाँव ज़गै नोराए रँःधुन्या लेर। आव नाम नम ओमाताद ज़ डालाई मया दाद नज़गैर नयाँके। 25 अ सतस न्याय दाज्याव डाबाबु, आव मानुवाताव मिँराए नँलाई यामासरेस्निदी ब डा ते डासरेस्निज्या। आव नमीराए मनी डा नल्योनी ज़ डाहुव लिन्या सैद नैर। 26 डा नोरालाई नमिन डारासथैके, फरी ब सथैन्या ज़ डाले। हो ताकिन ची डालाई नदाँज्याव मया नोरास तान्या ले,

डा ब नोरास ज्ञ तान्या डाले।”

18

येसुलाई याक्योःव

(मत्ती २६:४७-५६; मर्कूस १४:४३-५०; लूका २२:४७-५३)

१ येसुए आव भरी पोंखारिद उसिसरास किद्रोन घैरा होफताव बगैचाल बाकेर। २ नो पो येसुलाई सूँपिज्ञ्याव यहूदा इस्करियोतए मनी सैद ओनैज्ञ्याव। येसु उसिसरास एकतार नो पोक याबाज्ञ्याव। ३ है जैद यहूदा इस्करियोतए फरिसीर सोनो मुख्या पुजारीराए यारापरीं व ध्यान झिमलाव पाल्यार सोनो सिपाईर लाँद नो बगैचाल बाकेर। नोरास हत्यारर, लाल्तिनर भाँर ब लाँद यानैज्ञ्याव। ४ येसुए ओक्याँत हुरिज्ञ्याव दुखर सैद ओल ज्ञ नोराए याल्योक बाद, “जे सुलाई जेखिमज्ञ्याव?” है ओरादोक ते, ५ नोराए, “नासरतलाव येसुलाई,” है दोकेर। नाःत ज्ञ येसुए, “हो ताकिन ते नासरतलाव येसु डा ज्ञ,” है यादोक्यो। येसुलाई धोका याज्ञ्याव यहूदा इस्करियोत ब नोरास नक ज्ञ च्याँःसिद उलिज्ञ्याव। ६ येसुए, “डा हो ज्ञ,” है ओरादोव प्राईंना नोर प्राईं ज्ञ याछींदा सरिद पलतिकेर। ७ येसुए फरी ब, “जे सुलाई जेखिमज्ञ्याव?” है ओरादोक ते, “नासरतलाव येसुलाई,” है दोकेर। ८ येसुए, “जेलाई आछ्या ज्ञ ‘डा हो ज्ञ’ है डामादाचिउ रो? साचो डालाई वाज्ञ जेखिमनाज्ञ्याव ताकिन आव डानैरालाई बाव याराएचिके,” है यादोक्यो। ९ नो है ओरादोव डादाडाव ओपोंखारिकाव मिताव ‘तोबो ज्ञ कै मै तातारक’ है ओल्यो पाँ सयोःन्याए जूनी ज्ञ है ओरादोव। १० हाःत ज्ञ सिमोन पत्रुसए ओतरवाली हाइद प्रधान पुजारीए ओनोकोरलाई वोर्निकाव ओर्ना पलद् सतेदिक्यो। नो नोकोरए उमिन माल्खस ओल्यो। ११ येसुए पत्रुसलाई, “नतरवाली उसिपल झाःके। डाबाबु परमेस्वरए गोईंद ओयाँव दुखर डा कै जैद मासहिन्या?” है दोक्यो।

येसुलाई हन्नासए ल्योक यालाँव

12हा:त ज़ नक लिज़्याव कप्तान, उसिपाईर सोनो यहूदीराए यासैरराए यारापरींव पाल्याराए येसुलाई क्यो:द किद, 13 हन्नासए ओल्योक लाँकेर। नो हन्नास नो साललाव प्रधान पुजारी कैयाफाए ओबागे ओल्यो। 14 नो कैयाफाए ज़ डादा यहूदीराए यासैररालाई, “प्राईँ यासिज़्याव देखा बुरू नोराए पोल तोबो सिन्या पाथ लिज़्या,” है दाद सल्ला याज़्याव मिँ।

पत्रुसए ‘डा मा:क’ है ओल्यो

(मती २६:६९-७०; मर्कूस १४:६६-६८; लूका २२:५५-५७)

15हा: बेलाक पै सिमोन पत्रुस सोनो छुत तोबो उसिस येसुए उछीं उछीं निबाज़्याव। नो तोबो उसिस प्रधान पुजारीस डादाकिन ज़ निसरेस्सिज़्यावए नो उसिस प्रधान पुजारीए ओचतराक पै येसुस ज़ बाके। 16 सिमोन पत्रुस ते साँबिलाक च्याँ:सिद उलिज़्याव। नो प्रधान पुजारीस सरेस्सिउ उसिस ओल्द बाद साँबिलाक पाल्या लिज़्याव लुज़ालाई है दाद पत्रुसलाई ओलस ज़ चतराक लाँक्यो। 17 पत्रुस साँबिलाक उपसिज़्याक नो लुज़ाए, “नँ ब नो मिँए उसिस ज़ सा?” है ओदोक ते, पत्रुसए, “अहँ, डा मा:क,” है दोक्यो। 18 नो चतराक नलाव येन दाज़्यावर सोनो पाल्यार याज़्युँ:वए में: दाद यामुडँसिज़्याव। पत्रुस मनी नोराए ल्योक बाद में: मुडँसिनाके।

प्रधान पुजारीए येसुलाई ओखोले-व

(मती २६:५९-६६; मर्कूस १४:५५-६४; लूका २२:६६-७१)

19नकिन नो प्रधान पुजारीए येसुलाई ओरापैज़्याव सोनो उसिसराए जूनी ओखोले:क ते, 20 येसुए, “डा डारासिऊज़्याव पाँर म्मोसिद मा:क, प्राईँए रँ:न्याक, प्राईँए डाक ज़ डारापैज़्या। यहूदीर यादुपसिज़्याव धर्मसास्त्र झिम झिमक सोनो ध्यान झिमल ज़ डारासथैके। 21 काराव डालाई नखोले:नाज़्याव? डापाँ थैवरालाई ज़ यासुधिके, नोराए ज़ नँलाई है दान्या लेर,” है ओदोव प्राईँना

ज़, ²² नक लिज़्याव तोबो पाल्याए, “नँ कै जैद नाःल्दिउ प्रधान पुजारीस याः नदोज़्याव?” लिद तखेप लप्तैक्यो। ²³ हाःत ज़ फरी येसुए, “डा मापाँन्या डापाँव ताकिन डागल्ती सतैके, डा थिक ज़ डापाँज़्याव ताकिन काराव नपोनाज़्याव?” है दोक्यो। ²⁴ नकिन हन्नासए येसुलाई किसिउ ज़ प्रधान पुजारी कैयाफाए ल्योदा परीक्यो।

पत्रुस फरी ब ओमाभैःव

(मत्ती २६:७१-७५; मर्कूस १४:६९-७२; लूका २२:५८-६२)

²⁵ नाःपै सिमोन पत्रुस लाँःक च्याँःसिद मेंः मुइंसिउ ज़ उलिज़्याव। नक लिज़्यावराए, “नँ ब नोए उसिस ज़ सा?” है यादोक ते, पत्रुस माभैःद, “डा हो माःक,” है यादोक्यो। ²⁶ प्रधान पुजारीए तोबो ओनोकोर, डादा पत्रुसए ओर्ना पल्द सतेद ओएज़्यावए ओक्याँदाडाव ब नक उलिज़्याव। होए मनी पत्रुसलाई, “नँलाई आछ्याक येसुस बगैचाल नलिज़्याव डारँःनिउ सानी,” है ओदोक ते, ²⁷ पत्रुसए फरी ब माभैःद, “डा माःक,” है ओदोव प्राइँना ज़ भाल्या कोके।

रोमी सरकारलाव पिलातस

(मत्ती २७:१-२, ११-१४; मर्कूस १५:१-५; लूका २३:१-५)

²⁸ नकिन छकालन्या घग ज़ कैयाफाए उझिमनी येसुलाई रोमी हाकिमए ओमहलल लाँकेर। नो लाँज़्याव यहूदीर ते, ‘झुथो ताद निस्तार पर्वत भत्यार ज़्याव गेमादैया’ लिन्या छ्यासए महलल मापसिकेर। ²⁹ है जैद हाकिम पिलातस ओल ज़ महलनी लाँःक पुलुसुद नोराए ल्योक बाद, “जे आव मिँलाई काता ओखत पलेद जेएज़्याव?” है ओरादोक ते, ³⁰ प्राइँए ज़ तपाँ जैद, “आवए ओखत ओमाल्यो ताकिनी, नल्योक काराव गेरैरिज़्याव?” है यादोक ते, ³¹ पिलातसए, “जे ज़ लाँद जे यहूदीराए जेकानुननी ज़ फाल्चिके,” है ओरादोक ते, यहूदीराए यासेरराए, “गे गेकुइत सैःन्या हक माले,”

है दोकेर। 32 नो पाँत ज़ येसुए झ़ादा 'इतावनी ड़ासिरिज़्या' है उलिज़्याव पाँ योःके।

33नकिन पिलातस महलल पसिद येसुलाई खुल्द, “नँ साचो यहूदीराए याराजा ज़ रो?” है ओदोक ते, 34 येसुए, “आव पाँ नँ ज़ नसैव सैँ ड़ाजूनी सुवाराए है यादीव?” है ओदोक ते, 35 पिलातसए, “ड़ा काता ड़ासैए, ड़ा यहूदी माःक। नँ नजातलाव मिँर सोनो मुख्या पुजारीराए ज़ ड़ाल्योक रैद नैनिर। नँ मादान्या येन काता नदोव?” है ओदोक ते, 36 येसुए, “ड़ा ड़ाराज़्या आव मानुवाताव माःक। ड़ाराज़्या मानुवाताव ताकिन, आव ड़ालाई क्योःज़्याव यहूदीराए कुइनी जोगोइन्याए जूँनी ड़ाधूँलावर खप्सिना हुखेरहो। खाली ड़ा ड़ाराज़्या आलाव माःक,” है दोक्यो। 37 हाःत ज़ पिलातसए फरी, “हुकी नँ राजा ज़ रो?” है ओदोक ते, येसुए, “ड़ा राजा ड़ालिज़्याव नँ ज़ है नदाँज़्या सानी। होए उजूँनी ज़ ड़ा आव मानुवात जर्मिद साचो पाँए ओगोहाई याना ड़ाहुके। है जैद सतलाव पाँल लिज़्याव भरी ड़ापाँ थैद दोज़्यार,” है ओदोक ते, 38 पिलातसए, “सतलाव पाँ काताकी?” है दाद लाँक यहूदीराए ल्योक बाद, “ड़ा आव जेरैव मिँए ओखत कान्त ज़ ड़ामादैए। 39 जेकानुनल निस्तार पर्व छचाम तोबो कैदीलाई रास्न्या चलन लिज़्या। है जैद सैँ आथ पाला आव यहूदीराए याराजालाई रास्द ड़ायाच्यो रो?” है ओरादोक ते, 40 नोराए, “आवलाई माःक, बारब्बालाई रास्द्यासिके,” लिद किकेर। बारब्बा तोबो चोर दाँका ओल्यो।

19

येसुलाई सैःन्या याथरैव

(मती २७:१५-३१; मर्कूस १५:६-२०; लूका २३:१३-२५)

1नाःत ज़ पिलातसए येसुलाई रीःन्याए जूँनी सिपाईरालाई यासूँपिक्यो। 2 सिपाईराए जुए मुकुत र०द ओडैत जास्द घ्यामर्यासो क्वा जास्द, 3 ओड़ाक बाद बरेद, “यहूदीराए याराजा,

जय जय ओताक,” है ल्यो जैसिउ येन ओडाःत लफरैदिकेर।
 4 पिलातस फरी तखेप लाँःदा पुलुस्द नो माहोल्यारालाई, “दे आवलाई जेलाई ज़ रैद डायचिज़्या। डा डाल्योनी ते आवए ओक्याँत काता खत ज़ डामादैए, जे ज़ सैंचिके,” है ओरादोव प्राइँना, 5 येसु ओल ज़ नो जुए मुकुत जासिसिउ, घ्यामो क्वार क्वाइसिसिउ याड़ाक पुलुस्के। हाःत ज़ पिलातसए, “चिऊचिके, आव ज़ जेरैव मिँ,” है यादोक्यो। 6 हाःत ज़ नक लिज़्याव मुख्या पुजारीर सोनो पाल्यार येसुलाई यारँःव प्राइँना ज़ बनै चोइस क्रिद, “क्रुसत तज़ैद सैःन्या!” है यादोक ते, पिलातसए, “हो ची ताकिन्दा जे ज़ लाँद क्रुसत तज़ैचिके। डा ते आवए ओखत काता ज़ डामादैए,” है ओरादोक ते, 7 यहूदीराए, “आव मिँ ओलनी ज़ परमेस्वरए ओज़ा ओजैसिउनी गे यहूदीराए गोकानुननी सिन्या सजा दैव ज़ परिए,” है दोकेर। 8 पिलातस इताव पाँ थैद झन ज़ छेःद, 9 येसुलाई महलल लाँद फरी ब, “नँ काताडाव नताव?” है ओदोक ते, येसुए झन ज़ घाइ ज़ मादोक्यो। 10 पिलातसए फरी, “डालाई काराव घाइ नमादाँज्याव? नँलाई तज़ैन्या तादी ब रासून्या तादी ब डा डाकुइत उलिज़्याव नमासैए रो?” है ओदोक ते, 11 येसुए, “परमेस्वरए नँलाई ओमाईव ताकिन डा डाक्याँत नहक काता ज़ मालिखेहो। है जैद डालाई क्योःद नँलाई याज़्यावर नँकिन घ्योःव पापल ज़ परिकेर,” है दोक्यो।

12 पिलातसए निताव ओपाँ थैद येसुलाई रासून्या बनै धामा दोक्यो। हितावत ब यहूदीर झन ज़ क्रिद, “आव मिँलाई नरासकिन नँ माहाराजाए ओनैँ ज़ माःक। यानी राजा जैसिज़्याव भरी माहाराजाकिन तँदाडावर ज़ ताज़्यार सानी,” 13 है यालिज़्याव थैद पिलातसए येसुलाई लाँःक रैद हिबू खामनी गब्बथा यादोज्याव लुँ छापिसिउ चतराक लाँद ओल फालून्या पोल चुसिके। 14 नो

छचाम निसुतार पर्वण ओङ्गालाव तयारीलाव दिन लाकाव बाह बजेवाक ओल्यो। पिलातसए यहूदीरालाई, “चिऊचिके, आव ज़ जेराजा,” है ओरादोक ते, ¹⁵ नोराए झन, “आवलाई नैन्या माःक, क्रुसत तङ्गैद सैःन्या ची,” है लिद किकेर। पिलातसए फरी, “काराव जे जेराजालाई क्रुसत तङ्गैद सैःन्या है जेदाँजूयाव?” है ओरादोक ते, मुख्या पुजारीराए, “गेराजा रोमी माहाराजाकिन सु ज़ माले,” है यालिङ्ग्याव ¹⁶ थैद पिलातसए येसुलाई क्रुसत तङ्गैद सैःन्याए जूनी यहूदीरालाई ज़ याभीःक्यो।

येसुलाई क्रुसत यातङ्गैव

(मती २७:३२-४४; मर्कूस १५:२१-३२; लूका २३:३२-४३)

सिपाईराए येसुलाई यापासल रैद, ¹⁷ नोराए येसुलाई उक्रुस ओललाई ज़ सुधुर्द गलगथा यादोज़्याव पोक लाँकेर। हिब्रू खामनी गलगथाए ओअर्थ ‘खपपर्या पो’ ज़। ¹⁸ नक नोराए येसुलाई क्रुसत तङ्गैकेर। हो छचाम ओलस छुत नेब्लोनिलाई मनी ओलस ज़ यारातङ्गैकेर। येसुलाई खार्ल जैद तोबोलाई ओवोर्दा, तोबोलाई ओदाबर्यादा जैद सु सु याक्रुसत यारातङ्गैकेर। ¹⁹ पिलातसए फरी फल्यात तोबो सर्द, “आव नासरतलाव येसु, यहूदीराए याराजा ज़”

लिद येसुए उक्रुसत चदिक्क्यो। ²⁰ नो सर्सिउ हिब्रू, ल्यातिन सोनो ग्रीक खामनी ब उलिङ्ग्याव। येसु क्रुसत तङ्गैसिउ पो सहर छचोक ओतावए यहूदीराए कुधुए ज़ रँःद, ²¹ यहूदीराए मुख्या पुजारीर पिलातसए ल्योक बाद, “नताव नसरो ‘आव यहूदीराए याराजा ज़’ है लिद सर्न्या माःक, बुरू ओल ज़, ‘डा यहूदीराए याराजा ज़ है ओल्यो,’ सर्न्या ची,” है यादोक ते, ²² पिलातसए, “ताधुके, जो मिताव तादी ब ड़ासर्धुके,” है यादोक्यो।

²³नकिन येसुलाई तङ्गैद सैःजूयाव सिपाईराए येसुए ओक्वार चार भा जैद सु सु याजुँ लाँकेर। ओतर्ताव ओक्वाइसिङ्ग्याव ओक्वा

ते तपाता ज़ काङ्क ज़ मारूप्सिउ ओल्योए, ²⁴ “आवलाई चीन्या माःक, जोए ओल्योदा ओबादी ब गोला झाःव ताके,” है लिकेर। नो पाँत ज़ धर्मसास्त्रलाव पाँ ब योःके। नो पाँ आव ज़,

“नोराए डाक्वार भाःद लाँन्या लेर।

ओतर्ताव डाक्वात गोला झाःन्या लेर।”

है जैद सिपाईराए हैज़ जैकेर। ²⁵ हो बेलाक क्रुसकिन जाँ होकसैक येसुए ओआमा, ओआमाए ओबैनी, क्लोपासए ओज्या मरियम सोनो मरियम मग्दलिनीर च्याँःसिद यालिज़्याव। ²⁶ येसुए ओआमा सोनो उयुँलाव उसिसनी नक च्याँःसिद निलिज़्याव रँःद ओआमालाई, “आमा, नज़ा आव ज़,” है दोक्यो। ²⁷ नकिन फरी उसिसलाई, “चिऊके, आव नआमा ज़,” है दोक्यो। है जैद हो छचामकिन ज़ नो उसिसए येसुए ओआमालाई उज़िमक लाँद ओलस ज़ नैक्यो।

येसु उसिउ

(मत्ती २७:४५-५६; मर्कूस १५:३३-४१; लूका २३:४४-४९)

²⁸हाःत ज़ येसुए, ‘अब ते डाय़ेन भरी योःके’ लिन्या सैद धर्मसास्त्रलाव पाँ सयोःन्याए जूँनी, “री डाछोस्ज़्या,” है यादोक्यो।

²⁹ हाः बेलाक नक तोबो जाल सिरो दाखमद्य झाःद यानैज़्याव। नक लिज़्यावराए भाताए उतुपात थाकना पोःद नो सिरो रील छिम्द ओयाःत पिउ परीकेर। ³⁰ येसुए नो पिद, “अब ते डाय़ेन भरी दुम्के,” है लिद ओडै घोम जैद उस० सफ्याःक्यो।

³¹हो छचाम तयारीलाव दिन ओल्यो, सोनो घेपपा पर्बए ओडालाव छचाम ब उलिज़्याव। यहूदीराए याकानुननी हो छचाम नो यारासैःवरालाई क्रुसत नैन्या ओमाताज़्याव। है जैद नोराए नो क्रुसत तज़ैसिउरालाई यास० सफ्याःद्यान्याए जूँनी ‘याखँर केःद्याद क्रुसतिन झरैव ताके’ है लिद पिलातसलाई बिन्ती

दाद, ³² येसुए ओवोर्दाडाव मिंलाई उखँर केःदिकेर। नकिन ओदाबर्यादाडावलाई मनी उखँर केःदिकेर। ³³ नकिन येसुए उखँर केःना याबाक उसिधुव रँःद उखँर केःद माएकेर। ³⁴ हाःत ज़ नक लिज़्याव तोबो सिपाईए ओज़लए येसुए ओकोखाल घोइदिक्यो। ओघोइव प्राईना ओकोखानी झी सोनो री हुके। ³⁵ आव पाँ भरी तोबो मिँए ओल ज़ उरँःव। नोए ओपाँ साचो थंरिउ ज़ लिज़्या। है जैद आव पाँत जेयुँ उहुप्क। ³⁶ आव पाँ भरी धर्मसास्त्रलाव पाँ सयोःन्याए जूनी ज़ ताके। नलाव सर्सिउ आव ज़,

“नोलाई तके उरूस ब केःद्यान्या मालेर।”

³⁷फरी तोथोल इताव मनी सर्सिउ लिज़्या,

“नो ज़लए याघोइवलाई प्राईए ज़ रँःन्या लेर।”

येसुए ओमोरो खादरल याझाःव

(मती २७:५७-६१; मर्कूस १५:४२-४७; लूका २३:५०-५६)

³⁸आव भरी ओतावत अरिमाथियालाव योसेफ पिलातसए ल्योक बाद येसुए ओमोरो निक्यो। नो मिँ मनी येसुए ओपाँत बाज़्याव मिँ ज़ ओल्यो। खाली नोए यहूदीराए यासेरराए छ्याचेए येसुए ओपाँ जाँ मोंसिद ओदोज़्याव। नोए पिलातसए ल्योनी हक रैद येसुए ओमोरो लाँक्यो। ³⁹ नो डादा रील मोंसिद येसुए ल्योक हुज़्याव निकोदेमस मनी योसेफस उलिज़्याव। नोए बनै चाव सी डरो जरार हेःसिउ बरेःद तुगुर ज़ घुर्द रैक्यो। ⁴⁰ नोनी यहूदीराए याचलन मितावनी येसुए ओमोरोलाई नो उसी डरो जरार झाःद क्वाए लुम्बैकिनी। ⁴¹ येसुलाई क्रुसत तङ्गैसिउ पोकिन जाँ होकसैक तोबो बगैचा उलिज़्याव। नो बगैचाल सुलाई ज़ यामाझाःताव साःरो खादर तोबो उलिज़्याव। ⁴² है जैद यहूदीराए तयारीलाव दिन ओतावए, नो नजिककाव लिज़्याव खादरल ज़ येसुए ओमोरोलाई

ज्ञाःकिनी।

20

येसु सिउनी सैसिद ओबाव

(मत्ती २८:१-८; मर्कूस १६:१-८; लूका २४:१-१२)

१सातालाव उस०कताव छचाम छकाल्न्या ओमासँद ज़ मरियम मग्दलिनी बनै घग ज़ येसुए ओखादरक ओबाक नो खादर याःताव कसिउ घ्योःव लुँ हाइसिउ रँःक्यो। २ निताव रँःद ननी धोंःनाद सिमोन पत्रुस सोनो येसुए उयुँलाव उसिसनी निल्योक बाद, “गेप्रभुलाई ते काताकावराए खादरनी हाइद यालाँव ओल्यो। काना यालाँव गेमासैए,” है उनिदोव प्राइँना, ३ पत्रुस सोनो येसुए छुत उसिसनी हतपूत ज़ खादर पोदा धोंःनाकिनी। ४ निधोंःनाजूयाक पत्रुसलाई बलेंद ओनैँ झ़ादा खादरक केस्के। ५ नो खादरल मापसिद घोम लिद उचिऊक येसुलाई लुम्बैसिउ क्वार वाज़ रँःक्यो। ६ नकिन छचावाक सिमोन पत्रुस मनी खादरक ओकेसहुव प्राइँना ज़ खादरल पसिद उचिऊक होए मनी येसुए ओमोरो लुम्बैसिउ क्वार वाज़ रँःक्यो। ७ नो ओडैताव पोःसिउ क्वालाई फरी नो ओमोरो लुम्बैसिउ क्वाकिन जाँ अछतड पतैद नैसिउ रँःक्यो। ८ हाःत ज़ नो ड़ादा हुव येसुए छुत उसिस मनी खादरल पसिद प्राइँ चिऊद येसु ओसोव ज़ ओल्यो लिद उयुँ हुपके। ९ नोनी नोकिन ड़ादा नो धर्मसास्त्रलाव सर्सिउ पाँ ‘येसु उसिदी ब सोन्या ले’ लिन्या निमाथरैताव। १० नकिन नो उसिसनी निझिमदा ओल्द बाकिनी।

येसु मरियम मग्दलिनीए ओड़़ाक ओसरैःसिउ

(मत्ती २८:९-१०; मर्कूस १६:९-११)

११मरियम मग्दलिनी ते खादर छचोक च्याँःसिद घरो ज़ उलिजूयाव। नाःत ज़ घोम लिद खादरल तखेप ओभाल्सिक, १२ परमेस्वरए ओचाकर्यानी नेब्लो पाल पालो क्वा क्वाइसिउनी निरँःक्यो। नोनी येसुलाई नैसिउ पोक तोबो उगुमदा, तोबो उखँदा चुसिद

निलिज्याव। ¹³ नोनी मरियमलाई, “अ माँ, नँ काराव नघर्जूयाव?” है निदोक ते, नोए, “डाप्रभुलाई काताकावराए आव खादरनी हाइद यालाँव ओल्यो। काना यालाँव ओताव डामासैए,” है निदोक्यो। ¹⁴ नाः है दाद नो मेंमा उछींदा ओभाल्सिक येसु नक च्याँःसिद उलिज्याव रँःक्यो। खाली येसु ज़ लिन्या मासरेस्धुक्यो। ¹⁵ हाःत ज़ येसुए, “अ माँ, नँ काराव नघर्जूयाव, सुलाई नखिमजूयाव?” है ओदोक ते, नो मेंमाए, आव ते बगैचालाव माली ची सा लिद, “अ दाज्यु, येसुलाई नँ आनी हाइद नलाँव ताकिन, ‘आक डानैजूया’ है दाव ताके। डा होलाई डालाँरिजूया,” है ओदोक ते, ¹⁶ येसुए, “अ मरियम,” है ओदोव प्राइँना नो मेंमा ओल्योदा फर्किद, “रब्बोनी!” है दोक्यो। (हिब्रू खामनी रब्बोनीए ओअर्थ ‘गुर्बा’।) ¹⁷ हाःत ज़ येसुए, “डालाई ताछापनायो, डा आःपै डाबाबुए ल्योक डामाबाताए। बुरू डानैरालाई, ‘डाबाबु परमेस्वर सोनो जेबाबु परमेस्वरए ल्योदा डाबारिजूया’ है यादोनाके,” है दोक्यो। ¹⁸ हो प्राइँना ज़ मरियम मगदलिनी उसिसराए ल्योदा धोःनाद प्रभुलाई उरँःव सोनो है ओदोव पाँ भरी ब है यादोक्यो।

येसु उसिसराए याड़ाक ओसरैःसिउ

(मत्ती २८:१६-२०; मर्कूस १६:१४-१८; लूका २४:३६-४९)

¹⁹हो छचाम रिमक ज़ येसुए उसिसर यहूदीराए छचाचेए ग्राम गल्द झिमल यालिजूयाव। नो छचाम आइतबार ओल्यो। नाःत ज़ येसु उमँःजानी उसिसराए खाल च्याँःसिहुद, “जेयुँर होलाँ ओताक,” है लिद, ²⁰ येसुए उकुइर ओकोखार सतैँद याएक्यो। याप्रभुलाई रँःद नोर यायुँर होलाँ ताद बनै रेंकेर। ²¹ येसुए फरी ब, “जेयुँर होलाँ ओताक। किताव डाबाबुए डालाई उपरीनाव, हिताव ज़ जेलाई मनी डापरींचिजूया,” है दाद, ²² नोराए ल्योदा उस० ह्वास जैद, “आख ते छैँव पुरूस दोचिके,” है यादोक्यो। ²³ नकिन फरी, “जे मिँरालाई यापाप क्याल्द जेराएकिन, नोराए यापाप क्याल्सिद परमेस्वरस

खैवर तान्या लेर। फरी यापाप क्वाल्द जेमाराएकिन नोराए यापाप हिताव ज़ रहिरिज़्या।”

थोमाए येसुलाई ओसरेसो

24 येसु उसिसराए ल्योक उहुव छचाम दिदुमस यादोज्याव थोमा नल ओमाल्यो। 25 छीनी उपुर्काव उसिसराए थोमालाई, “गे गेप्रभुलाई गेरै:के,” है यादोक ते, नोए, “डा झँ किलाए उकुइ सघ्वाँ:सिउ कुँ रँ:द होल डाआडुला डामालुइवा पै सोनो ओकोखाल डाकुइ डामालुइवा पै डायुँ ज़ माहुबे,” है यादोक्यो।

26 हुकिनकाव साताक फरी उसिस भरी ग्राम गल्सिद झिमल यालिज़्याव। हो छचाम ते थोमा ब यास ज़ उलिज़्याव। हा:त ज़ निताव ग्राम गल्सिउ उलिज़्यावत ब येसु उमँ:जानी याखाल च्याँ:सिहुद, “जेयुँ होलाँ ओताक,” है यादोक्यो। 27 नकिन थोमालाई, “आव डाकुइ सघ्वाँ:सिउल नआडुला लुइके, डाकोखाल ब नकुइ लुइद माहुबो नयुँलाई सुहुप्के,” है ओदोव प्राइँना, 28 थोमाए, “अ डाप्रभु, डापरमेस्वर, नँ ज़ ची नल्यो,” है लिके। 29 हा:त ज़ येसुए, “थोमा, नँ ते डालाई रँ:द नयुँ हुप्के। खाली डालाई मारँ:द उयुँ हुपज़्याव ते झन धन्याकाव लिज़्या,” है दोक्यो।

आलाव सर्सिउ जेयुँ सुहुप्यान्याए जूनी ज़

30 येसुए उसिसराए याड़ाक आव पोस्तोकोल मासर्सिउ छुत सरेसर मनी कुधु ज़ सतैद याएक्यो। 31 खाली आलाव सर्सिउ भरी जे येसुलाई, परमेस्वरए ओज़ा गेलाई बाँचैज़्याव ख्रीस ज़ लिद जेयुँ सुहुप्यान्याए जूनी सर्द डायचिके। हो ताकिन ची जे नोए ल्योदा जेयुँ जेसुहुपकिन होए उमिननी अजम्बरी जुनी दैन्या जेले।

21

ल्यो माल्यो डाँ:र

1 फरी छीनी मनी तछा येसु उसिसराए याड़ाक गालील खन्दलाव

तिबेरियास दहक सरैःसिके। नक इताव ताके — 2 नक लिज्यावर सिमोन पत्रुस, दिदुमस यादोज्याव थोमा, गालीललाव काना नाखारलाव नथानेल, जब्दियाए ओज़ानी सोनो छुत नेब्लो उसिसनी याल्यो। 3 नो बेलाक सिमोन पत्रुसए ओनैरालाई, “डा ते डाँःर क्योःना ची तखेप डाबारिज्या,” है ओरादोक ते, ओनैराए, “गे मनी नँस ज़ गेबारिज्या,” है दाद नोर प्राईँ दोङ्गाल पसिद रील तुबुरी लिद ब डाँःर तोबो ब माताकेर।

4 नम ज़राँः ज़राँः उसँनाक येसु दह छचोक च्याँःसिद उलिज्याव। खाली उसिसराए येसु ज़ लिद मासरेसुधुकेर। 5 हाःत ज़ येसुए, “अ बाबुज़ार, डाँःर खावा तार्या की?” है ओरादोक ते, “अहँ, तोबो ब मातार,” है दोकेर। 6 नकिन येसुए, “जेदोङ्गाए ओवोर्दा जेजाल ख्याचिके, नल डाँःर दैन्या जेले,” है ओरादोक ते, याजालर याख्याक ल्यो माल्यो डाँःर हुद याजाल ब मासेलुधुकेर। 7 हाःत ज़ येसुए उयुँलाव उसिसए पत्रुसलाई, “नो ते गेप्रभु ज़ ची ओल्यो,” है ओदोव प्राईँना पत्रुस लाला लुलु हाइसिउ ओक्वार क्वाइसिद दहल ज़ोःद येसुए ल्योदा बाके। 8 उपुर्काव उसिसर ते दोङ्गाल ज़ लिद डाँःर ल्यो जाललाई सेले सेले पाखात पुलुस्केर। नो डाँःर याराक्योःव पो कोसै तादाड ते ओमाल्यो, दह छचोकिन तसय मितरवा वाज़ ओल्यो।

9 नोर दह छचोक याहुवत मेंः दासिउ मुथाल येसुए भरेसर डाँःर हिप्द ओनैज्याव रँःकेर। 10 नाःत ज़ येसुए, “जेराक्योःव डाँःर नेबरेंवा रैचिके,” है ओरादोक ते, 11 सिमोन पत्रुस दोङ्गाल पसिद नो डाँःर लिज्याव जाललाई पाखात सेल्द रैक्यो। नल घेप्पा घेप्पा डाँःर तसय त्रिपनन् गोता यागैव ओल्यो। हितावत मनी नो जाल जात्त ज़ ओमाचिसो ओल्यो। 12 नकिन येसुए फरी नोरालाई क्रिद, “जेयाः बितालिहुचिके,” है यादोक्यो। नोराए फरी येसुलाई यासरेसुदी ब सुए ज़ ‘नँ ते गेप्रभु ची सा’ है मादोधुकेर। 13 येसु हुद भरेसर डाँःर

उकुइत रैद नोरालाई भाःद याएक्यो। 14 येसु सिद सैसिद ओसोव छीनी उसिसराए डाक आवस सोखेप सरैःसिके।

येसुए पत्रुसलाई सोखेप उमीं ज ओजैव

15नोर यायाःर याबितालिउत येसुए सिमोन पत्रुसलाई, “अ यूहन्नाए ओजा सिमोन, नँ डालाई आवराकिन कुधु ज मया नदाँज्याव रो?” है ओदोक ते, पत्रुसए, “हैज प्रभु, नँलाई मया डादींज्याव नँ ज नसैंज्या,” है ओदोक ते, येसुए, “हो ची ताकिन्दा डापाथार छोद्याँके।” 16नकिन येसुए फरी ब, “अ यूहन्नाए ओजा सिमोन, डालाई साचो ज मया नदाँज्याव रो?” है ओदोक ते, पत्रुसए, “हैज प्रभु, नँलाई मया डादींज्याव नँ ज नसैंज्या,” है ओदोक ते, येसुए, “हो ची ताकिन्दा डाबेधारालाई याचिऊयो,” है दोक्यो। 17 फरी ब येसुए, “अ यूहन्नाए ओजा सिमोन, है जैद डालाई मया नदाँज्याव ज रो?” है ओदोक ते, पत्रुसलाई नो पाँ सोखेप है ओदोवए पत्रुसए उयुँ माचाव दाद, “प्रभु प्राईं युँलाव पाँ नसैंज्या। नँलाई मया डादींज्याव मनी नँ ज नसैंज्या सानी,” है ओदोक ते, येसुए, “हो ची ताकिन्दा डाबेधार पाथस छोद्याँके। 18 डा नँलाई साचो है डादींज्या, नसार् उलिज्याव बेलाक नवाँःफोर पोःसिद जोदा बान्या नयुँ लिज्या होदा ज नबाज्याव। खाली नसार् खेमद नसेरोत नकरर राःद्याद नवाँःफोर छुतए पोःद्याद बान्या युँ नमादोज्यावदा करस ज लाँन्या लेर,” है दोक्यो। 19 येसुए आव पाँर, ‘पत्रुस इतावनी सिद परमेस्वरए उमिन सघ्योःद्यान्या ले’ लिद डादा ज सतैदिक्यो। है जैद येसुए पत्रुसलाई आव भरी है दाद, “डाछींत हुन्के,” है दोक्यो।

20नाःत ज पत्रुस उछींदा ओभाल्सिक येसुए उयुँलाव उसिस मनी उछीं उछीं उहुज्याव रँःक्यो। नो उसिस ज डादाडाव नो भतयारल येसुए ओछातीत कँ लिद, “प्रभु, नँलाई धोका याज्याव सु?” है दाज्याव मिँ। 21 पत्रुसए नोलाई रँःद येसुलाई, “प्रभु, आवलाई छींनी कै तान्या?” है ओदोक ते, 22 येसुए, “डा फरी डामाहुवा पै नो मिँलाई

मासिन्या डाजैदी ब नँ है लिन्या काता ओमेला ज़ माले, नँ डाछींत घुहुनी,” है दोक्यो। ²³ नो येसुए ओपाँनी ज़ नो उसिस सिन्या माले लिन्या यायुँ हुबोराए खार्ल फीजिके। खाली ओल येसुए ते ‘आव सिन्या माले’ है ओदोव ते माःक। ‘डा फरी डामाहुवा पै आव मिँ ओमासिदी ब नँ है लिन्या ओमेला माले,’ है वाज़ ओदोव ची।

²⁴आव पाँर डामीए रँःद सर्ज़याव डा नो उसिस ज़। आव डासरो पाँ भरी साचो थ०रिउ ज़ लिज़्या।

²⁵आव डासरोकिन येसुए छुत ब कुधु येनर ज़ दाद नैव। खाली तोबो तोबोनी सर्न्या ताकिन सर्सिउ पोस्तोकोर आव मानुवात ब मासुइँःखेहो।

साःरो बाचा

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd